

東
華
續
錄

東華續錄

同治八

臣王先謙敬編

臣張式恭恭校

夏四月癸丑朔諭議政王軍機大臣等瑞璜奏福州防務喫緊請添調勁旅赴北路防剿一摺據稱福甯府爲省垣北路門戶前溫州平陽會匪闖入福鼎縣幾至蔓延見在秦如虎所統兵勇業已進紮溫郡驟難兼顧閩境設該逆乘虛窺竄福州省城有坐困之勢卽慶端軍營亦增後路之憂等語慶端見紮浦城規復浙江兼以保衛閩境設後路稍有疏失必有腹背受敵之患曾元福所部臺勇三千名已赴慶端軍營其續雇臺勇三千名著准其飭赴福甯交總兵曾玉明統領會商候補道曾憲德扼要駐紮耆齡已經起程日內計可抵閩所有布置一切及嚴防後路事宜著卽會同

慶端安籌調度徐宗幹計已抵任所有防剿福甯及省城防守機宜責無旁貸均著妥籌兼顧毋令賊蹤闖入閩境副將吳鴻源師船已駛赴温州秦如虎陸路兵勇亦進紮該郡其近日溫衢一帶援剿情形並著慶端耆齡隨時馳奏以慰廑念將此由六百里各諭令知之○左都御史沈岐卒予祭葬如尙書例諡文清○甲寅

上御太和門恭閱 孝靜成皇后尊諡 冊 寶遣官恭送

慕東陵○諭議政王軍機大臣等薛煥奏水陸各軍收復洙涇一摺據稱曾秉忠分撥師船進攻洙涇並調已革副將馮日坤等帶領陸隊直搗賊巢知縣陳紹本帶領練勇民團隨同進剿於三月十四日將洙涇收復已明降諭旨准將出力之員擇尤保獎矣該匪竄踞洙涇一月有餘此次經官軍擊退向楓涇新埭兩路竄去著薛煥李鴻章卽飭曾秉忠督率各軍乘勝追剿毋令紛竄並整

頓隊伍爲進攻青浦之計曾秉忠以提督大員潰師失事雖此次激勵諸軍收復洙涇尙屬功不掩過著俟續有勞績再行奏請恩施又據吳棠奏髮逆竄撲揚城賊眾兵單請飭水陸兵勇分道接應等語李鴻章所部兵勇前據曾國藩奏稱分三起下駛業經諭令該署撫將上海事宜布置稍定帶兵駐紮鎮江俾都興阿得資聯絡見在揚防喫緊恐難曠日待援著李鴻章卽令後起赴防兵勇於行抵瓜儀時先其所急會合都興阿之軍迅將撲揚逆匪奮力勦擊毋誤事機儻李鴻章能先赴鎮江一帶相機應援尤屬妥善將此由六百里加緊諭令知之○諭吳棠奏泗境另捻東趨派兵扼剿一摺據稱捻首韓老萬等糾合大股竄至桃境意圖東竄經副將黃國瑞等帶隊迎擊該捻分竄高良澗等處均被擊退等語前股敗捻李加英等甫經擊剿回巢此股巨捻又復接踵而至

若非痛加勦洗不足絕其窺伺之詭謀著吳棠嚴飭在事將弁實力扼勦盡殲醜類其蔣壩衡陽兩路爲裏下河門戶尤應嚴密防守黃國瑞前次疊著戰功爲賊所畏卽著飭令帶隊由山陽南岸鈔出賊前攔頭截擊吳棠仍派得力兵勇會合夾擊以期一鼓殲除毋令竄逸揚城爲裏下河屏蔽關繫江北大局著僧格林沁酌派一軍馳往應援若實在不敷分勦卽咨令吳棠會合都興阿等軍將東竄另捻迅速勦除庶清淮防兵卽可回援揚郡李鴻章見已到滬其新募六千曾國藩前次奏報內有分作三次由輪船裝載到防之語約計此時第二三起勇丁必已陸續啟行卽著曾國藩遴派得力將弁管帶迅速東駛會合揚防各軍將此股匪眾盡力勦辦再赴滬防實於大局有裨其黃翼升所部水師並著曾國藩飭令迅赴下游以壯聲勢而資策應見在圍攻江浦浦口之賊

業經李世忠等擊退各城營一律肅清敗殘餘匪若再併入揚境竄匪麇集滋擾其患尤不可勝言著都興阿就見有兵力嚴密堵剿不可稍涉大意馮子材昨奏揚境逆勢過重由鎮營挑兵三千名聽候策應等語著都興阿酌度形勢如揚防地廣路岐兵力不敷分布卽著函商馮子材如數調撥以資防剿將此由六百里各諭令知之○諭官文嚴樹森奏髮捻合股圍撲南陽府城請飭豫秦兩省撥兵堵剿瑛瑱張芾奏另股馬步捻眾突入商南縣境提臣親往督辦又另片奏請飭河南撫臣揀派官兵馳赴商南夾擊各摺片覽奏均悉河南另股捻匪由內鄉縣乘閒衝入富水關見已圍逼商南縣城並商州龍駒寨及四道嶺武關一帶均有賊蹤經瑛瑱等將調赴潼關等處防兵一併撤回並添募勁勇前赴商南商州堵禦孔廣順見在馳往商州著卽督率各軍迎頭擊剿毋

令竄入腹地官文見派何紹彩統率四營由宜昌徑赴襄棗楚北防務諒可無虞該省鄖陽府毗連陝省去商雒尙不甚遠著官文等飛飭該鎮統帶得力兵弁不分畛域迅赴商州等處會同孔廣順併力擊剿務將此股竄匪悉數殲除勿畱餘孽李續燾在湖南募勇尙未起程必須道經湖北著官文迅催前進如楚北防兵因赴援陝省甚形單弱卽可暫畱此軍駐紮防剿瑛棨仍就見有兵力相機策應並著張芾前赴商雒一帶激勵民團以爲官軍後路聲援前由該省調赴豫省防河官兵馬隊五百名著鄭元善迅飭回省聽孔廣順調度並另行揀派豫省得力兵勇馳赴商南會合陝兵前後夾擊以期立解城圍盡殲醜類將此由六百里加緊各諭令知之○諭各路統兵大臣慎重餉糈○諭各省奏報募勇實數並明定功牌限制○景其濬疏進歷代君鑑 上嘉納之○子

江蘇陣亡遊擊岷祿等祭葬世職○乙卯諭內閣前據駱秉章奏
貴州提督田興恕咨稱情願帶兵前赴四川剿賊嗣據韓超奏報
該省紳民因聞田興恕赴川之信攀留甚切懇請俯順輿情各等
語因思貴州苗教各匪雖漸就削平亦未便遽易生手田興恕以
本省專閫大吏辦理本省軍務事權本屬專一所有欽差大臣關
防卽著田興恕自行恭繳並著毋庸前赴四川卽日出省督率兵
勇將貴州各股餘匪迅速殄滅以副委任○諭議政王軍機大臣
等駱秉章奏黔省苗教各匪尙未蕩平請飭熊煥章等迅帶楚勇
數千赴川會剿田興恕旣據該省紳民籲留卽仍畱黔省辦理軍
務等語田興恕前以勇往善戰不數年間擢至專閫該提督責任
旣重不免有自滿之處任用率多非人以致人言藉藉屢被參劾
該提督卽知悔悟自願赴川助剿歸駱秉章節制朝廷正深嘉悅

謂其勇於改過惟該提督既難遠離黔省卽著迅速出省攻克玉
華尙大坪兩山節節掃蕩肅清黔境仍可榮膺懋賞以副期望其
熊煥章等所部一千五百名由龔灘順流而下不過一晝夜可達
涪州著駱秉章迎提以資攻剿見在黔省軍務雖由田興恕督剿
而韓超係本省大吏地方軍務均其專責仍著商同辦理不得意
存諉卸韓超田興恕均由駱秉章保奏破格擢用駱秉章仍當不
時告誡庶該署撫等不至自滿招損以期保全儻有奏報粉飾及
剿辦未協之處並著隨時探奏毋得以保舉在前稍涉回護也將
此由六百里各諭令知之○諭前因有人奏田興恕信任劣員濫
保錢登選等至監司大員等款當經諭令駱秉章查奏嗣據駱秉
章覆奏錢登選冷超儒均屬市儉小人謝葆齡以跛足廢疾冒稱
打仗受傷張心培以劣幕專事攬權納賄趙國澍以團練爲名肆

行殘擾該五員毫無戰功均皆保至監司大員原參各款均屬實在情形續經韓超奏稱趙國澍等綜理軍需局務及團練事宜實心辦理著有成效訪諸輿論亦無間言並稱趙國澍歷辦防剿所向有功等語錢登選等五員既據賂秉章查明覆奏與原參各款均屬相符是該員等劣蹟昭著已可概見韓超輒稱該員等辦事均臻妥善仍畱謝葆齡等在局辦事顯係見好屬員若謂輿論並無間言何以物議沸騰遠播京師延及蜀省至所稱敎匪黨與散布謠言尤屬臆斷無據之詞藉口爲該員等開脫該署撫由道員超署巡撫自應破除情面力求整頓以期無負委任所有錢登選等被參各款仍著該署撫嚴行確查據實具奏毋得以田興恕保奏在前意存瞻徇代人受過原參招鈔給閱看將此諭令知之○丁巳諭議政王軍機大臣等鄭元善奏逆匪攻陷宜陽立時克復

見擾永甯盧氏一摺逆匪竄擾永甯盧氏一帶意圖翻山而南經鄭元善飛飭楊飛熊一軍繞扼西北跟蹤追擊前竄南陽之粵匪竄向內鄉淅川窺伺陝西商南邊馬已入陝界經鄭元善派令護總兵徐榮柱帶兵追剿此股永甯等處之匪若南竄內鄉與前股會合剿辦更形棘手前經諭令孔廣順就近督軍剿擊著卽會同河南派出之楊飛熊徐榮柱等軍兩面夾擊毋令闖入腹地瑛榮張芾仍遵前旨各派兵團相機策應爲孔廣順後路聲援官文等前派何紹彩統率四營迅赴商州等處會同孔廣順併力擊剿著卽嚴催前進與陝西河南兵勇三面兜剿將此股匪眾殲戮淨盡以絕根株楚邊毗連河南地方甚多並著官文嚴樹森督飭地方官妥爲防範無稍疏懈茅津渡爲由豫入晉門戶英桂前奏派總兵和昌會同河東道劉子城實力堵禦著英桂飭令和昌等先將

本境隘口布置周密並派兵渡河會合陝西防兵同赴陝州藩籬
關扼守如兵力不敷英桂卽添調勁旅前往堵截務宜練兵選將
未雨綢繆不得專以防剿事務諉之鄰省致誤事機鄭元善卽飛
飭楊飛熊徐榮柱等督兵出境會同陝西防兵夾擊務將竄陝之
匪截其歸路聚而殲旃不令一名回竄是爲至要豫省前調陝省
防河官兵馬隊五百名鄭元善迅飭回陝聽孔廣順調度仍揀派
豫省得力兵勇馳赴商南協剿以資得力將此由六百里各諭令
知之○諭都興阿奏擊退撲營逆匪並水陸剿賊獲勝一摺逆匪
攻撲前敵各營經官兵立時擊退並將竄渡溪塘及排列山崗之
賊擊敗其攻撲三汊河各營賊匪亦經官兵於凍青鋪一帶迎剿
獲勝沿江竄渡賊船復經師船擊敗並將岸上賊壘蹋毀剿辦尙
屬得手惟逆眾幾及二十萬尙有後股陸續渡江而來揚防見有

兵力勢恐不敷分布江浦等處賊營見已由李世忠攻克都興阿
務宜與李世忠聯絡聲勢和衷商辦一面激勵水陸兵勇嚴密防
堵毋得稍涉大意李鴻章一軍分作三起由輪船駛赴上海頭起
勇丁已由該署撫親帶至滬其後隊二三起勇丁亦可陸續駕駛
輪船由江面前赴上海著都興阿於李鴻章後起勇丁駛過瓜儀
時卽先行截畱在揚助剿以厚兵力俟賊勢稍鬆再撥歸李鴻章
調遣並咨催李鴻章到鎮會商合力攻剿肅清江北前據馮子材
奏挑選鎮兵三千聽候揚營調撥並著都興阿卽速檄渡江北助
剿以期早殄逆氛將此由六百里諭令知之○禮部奏本月二十
五日恭遇崇上 母后皇太后 聖母皇太后徽號請將傳臚日
期改於五月初五日舉行並改於初一日舉行殿試如所請行○
予河南殉難知縣謝仁溥等祭葬世職建祠○戊午雨○己未諭

內閣袁甲三奏官軍踴毀賊營奪回要隘一摺渡江逆賊經我軍
擊敗後竄踞安徽和州之駐馬河依險築營以通江南逆賊渡江
之路經提督李世忠督飭總兵王茂元等分道進攻追殺不可勝
計餘賊沿江敗竄復經我軍趕殺殆盡賊營一律踴毀立將駐馬
河要隘奪回所有在事出力文武員弁著准其彙入江浦六合各
城解圍案內擇尤酌保毋許冒濫○曾國藩奏查已革署九江鎮
總兵普承堯駐防建德雖值餉糈支絀總當善爲激勸力遏賊鋒
乃當池逆進犯之時不能堅守待援節節潰退致將縣城失陷按
律科罪誠不容辭惟念普承堯身經百戰襄事八年屢次受傷不
無勞績此次潰軍失事究由餉缺兵疲合無仰懇 天恩量從寬
減將普承堯發往軍臺效力贖罪是否有當伏候 聖裁 上諭
已革九江鎮總兵普承堯失守建德城池例有應得之咎惟身經

百戰屢次受傷建德失陷寶由餉缺兵疲尙可量從寬減普承堯著加恩發往軍臺效力贖罪○曾國藩奏鮑超一軍進駐青陽先平西北門山觜賊壘濬治長濠爲四面合圍計城賊潛糾死黨三萬餘眾由南陵竄踞銅陵之順安鎮銅陵守將周萬倬等出奇兵禦之賊稍卻鮑超由青陽分軍親赴銅陵救援遇賊橫塘賊恃眾迎拒王衍慶等陷陣而入黃慶顏紹榮繞襲賊後伍華瀚等分領馬步諸軍四出盪決衝賊數段斬僞主將洪逆於陣羣賊駭潰仍走南陵適周萬倬等水師與總兵唐學發亦率隊來會各軍合力奮追遂將橫塘至順安等處沿途卡壘一律剿除擒斬無算俘獲賊酋尤多先是僞奉王古澐賢偵知鮑超分兵而北陰結涇石太等縣悍賊數千在青陽南門外豬婆店地方增築九壘乃結壘甫成鮑超已振旅而還遂督飭將士分路齊進古逆傾巢出敵我軍

奮勇爭先明興伍華瀚以騎隊襲賊賊懼返巢仍復倚壘死拒唐
仁廉譚勝達於煙燄中拔開鹿角躍過濠溝麾軍直上一壘旣破
眾壘盡亂馮標等各軍乘勢薄之不逾時九壘悉平古逆率餘匪
遁往石埭軍士追襲四十里始行收隊青陽南路旣平鮑超以西
門屬之婁雲慶等以東門屬之黃慶等以北門屬之王衍慶等而
以楊鎮魁張應超爲游兵於三月十六日更番奮攻毀壘填濠進
次城下劉順隆等挽盾自障攀堞先登眾軍乘之立將縣城克復
先後數戰斃賊萬餘擒賊千一百名中有逆首僞遊天義周得瞬
等暨燕豫將軍丞相各僞職八十六名悉就擒縛奪獲礮械旗幟
難以數計浙江提督鮑超身先士卒調度得宜惟係專閫大員應
如何加恩之處未敢擅擬在事出力人員謹開列懇恩分別獎勵
出自 鴻施至陣亡將弁另繕清單請旨飭部從優議卹又奏查

李鴻章所部全軍皆抵上海淮揚鎮黃翼升乘坐輪船先至下游察看一次回至安慶再行督帶水師乘風下駛曾國荃一軍於三月十五日在巢縣之望城岡苦戰獲勝十八日攻破桐城牯賊壘十九日攻破鴈字鎮賊巢二十日辰刻克復巢縣午刻克復含山縣城此外尚有裕溪口牛屯河西梁山三處賊巢擬一面攻此三處一面進圍和州多隆阿一軍日內未開大仗廬郡圍逼甚緊聞將有四偽王大股由江浦上援然巢含既克賊已失勢左宗棠一軍與偽侍王大股轉戰於江山南境聞賊有假道閩境轉竄江西之意深爲可慮徽州各軍近尙安謐 上諭議政王軍機大臣等曾國藩奏稱南岸官軍克復青陽並北岸克復巢含等縣各摺片覽奏深爲欣慰鮑超旣克青陽著卽飭令由涇縣進攻甯國以掣浙中賊勢至逆眾盤踞廬州府城負隅抗拒雖經多隆阿等分道

進偏壘獲勝仗而該逆堅守待援情殊詭譎見在巢縣含山次第收復要害已爲我據雖有援賊諒已奪氣自宜乘此聲威一鼓攻克著曾國藩飭令多隆阿激勵將士迅速進攻李續宜計已馳抵六安卽著分兵赴廬會合多隆阿等軍四面圍逼迅下堅城毋令醜類日久稽誅浙省逆匪有假道閩境轉竄江西之意江右爲大軍餉源所自出且爲左宗棠後路關繫甚鉅見在沈葆楨馳赴廣信力籌堵扼第兵力尙屬單薄曾國荃一軍剿賊正在喫緊未能分兵策應江西各防門戶在在堪虞應如何酌撥兵勇前往協同防剿之處著曾國藩斟酌情形妥爲辦理將此由六百里各諭令知之○諭沈葆楨奏馳赴廣信督辦防剿並據曾國藩奏左宗棠一軍與僞侍王大股轉戰於江山南境聞賊有假道閩境轉竄江西之意各等語江西一省爲曾國藩左宗棠各軍營餉源所自出

關繫東南大局該逆由江山一帶意圖竄入江境斷左宗棠後路計殊狡毒曾國荃見已攻克巢縣含山自應乘勝前進不克回援江省王沐駐守撫州亦未可輕動是江省防務萬分喫緊沈葆楨業已馳抵信郡著卽就見有兵力嚴密布置並著號召紳耆實力辦理團練務令聲勢聯絡俾逆匪不至闖入江境方爲妥善左宗棠親率數營駐軍於江山廣豐交界處所著卽激勵將弁隨時覘賊所向迎頭截擊蔣益澧一軍計已由粵啟行著劉長佑傳諭該藩司督率所部星馳前赴左宗棠軍營助剿蔣益澧軍道出江西沈葆楨卽可酌量截留若干爲左宗棠後路應援至江閩唇齒相依若江省防禦謹嚴則閩疆更覺喫重慶端駐守浦城自應將江山等處之賊痛加截剿何以接仗失利竟至一籌莫展殊負委任著卽嚴飭在防將領以剿爲堵會合江西防兵將竄過廣豐之賊

擊退毋得稍有疏虞致干重咎前據耆齡奏交卸撫篆酌調飛虎等勇由江赴閩此時計已在途著卽尅日前赴建甯擇要駐紮會同江浙諸軍併力兜剿節節掃蕩與左宗棠商辦規復杭城徐宗幹計已到任著將閩省防剿事宜實心整頓以期吏治民風日有起色將此由六百里各諭令知之○諭薛煥奏比利時國使臣來滬投遞照會懇請換約一摺據稱比利時國公使包禮士自稱奉伊國主之命派至中華進京請立約通商經薛煥再三力阻北行始在滬候旨等語比利時國於九年間在滬投遞照會懇求通商經何桂清照覆其事並未具奏該國係法蘭西屬國通商各事理應附於法國名下辦理該公使所稱與英國爲姻婭之邦其意卽擬援上年布路斯國之例徑自換約已飭總理衙門告知法國在京公使力爲攔阻並著薛煥妥爲開導告以該國旣在各口通商

毋庸另立條約如該公使必求立約爲據卽照上年布路斯國之例辦理斷不能與英法相同此時該國換約與否於大體並無增損惟允行太易則恐得步進步翻多噍瀆不可不稍爲掣縱以防其弊著薛煥酌量情形妥爲籌辦該公使必欲來津務告以上年布國換約係由三口通商大臣崇厚辦理薛煥亦係辦理通商大臣事權相同在津允行者在滬亦可主持毋許遠涉重洋如此剴切攔阻不令北行方爲妥善該大臣責無旁貸諒此中機宜自能諳悉無俟諄諄訓誡也將此由六百里諭令知之○曾國藩奏蕪湖巨逆黃汶金賴積新等糾黨二萬突入荻港復分股竄陷舊縣水師李朝斌等在營房背擊賊獲勝遂率師船駛上舊縣會合萬化林等水軍登陸襲賊戰於街心賊負重創悉向山後潰走潛與荻港一股勾結繁昌蕪湖魯港之賊別圖竄擾時曾貞幹陸師

近駐三山夾密諭各營堅壁以待賊果分道來犯曾貞幹卽令曾正明率親兵馬隊會約水師循江岸而進一敗賊於洋夾沙再敗賊於三華山陣斬賊酋十餘名殲獲百餘人水師各營在斗門教化渡兩處擒斬亦多賊始悉眾遠遁荻港舊縣三山等處一律肅清臣仍飭嚴密守禦不得稍涉疏虞報聞○以復安徽青陽功賞提督鮑超珍物予陣亡參將李遇春等祭葬世職○庚申恭上

孝靜成皇后尊諡曰孝靜康慈懿昭端惠彌天撫聖成皇后○以私徵鹽課遣已革阿克蘇辦事大臣綿性戍吉林○王成勝保奏臣前在太和因邢家灣捻匪有接濟賊糧攻陷穗子鋪之事維時方以潁郡解圍爲重未便分兵追郡城圍解而捻首王懷義等竄擾歸陳淮鹿交界之間攻陷民寨三十餘處臣於三月十四日馳抵陳州督軍將賊擊退回巢旋派總兵黃得魁等移兵前往剿辦

穗子鋪邢家灣賊圩擒首邢冠軍聞潁州解圍大股被創屢遣人赴營稟請投誠以該逆爲張落刑羽翼若不痛加剿洗誠恐大軍一動故智復萌當卽嚴飭帶兵各官奮勇前進大軍亦向穗子鋪進發分路環攻斃賊數百名賊遂不支撲過浮橋齊向沙河南岸奔竄併入邢家灣賊圩我兵立將穗子鋪奪回一面分兵過河攻剿二十二至二十五等日疊次進攻該逆拒守甚堅見已挖掘長濠四面築營圍困並用大礮轟擊已攻毀牆垛十餘處斃賊不少指日當可攻克先是據總兵博崇武稟稱三月初十一等日督率苗練圍攻潁上賊巢將東北三門外賊營七座盡行踏毀斃賊六百餘名聞老巢賊首有悉眾來援之信當派副都統薩薩布等前往協同攻剿城內之賊見我軍圍攻緊急屢次乞降意圖延緩該員等嚴加防備二十三日賊忽由蒙亳老巢糾合五旗擒

眾馬步齊至我兵嚴陣以待賊眾見隊伍整齊未敢上前城內之賊見援賊已到由北門擁出千餘人我軍槍礮齊施斃賊不計其數二十五日賊復齊隊前來又經擊退斃賊頗多臣復恐該員等布置未必盡善及苗沛霖隨同官兵進剿是否實力向前均須親往察看常於二十七日馳抵潁上苗沛霖帶隊來迎長跪請罪臣先加斥責繼加戒勉感愧之象似出至誠並傳見前保副將苗憬開張建猷鄒長青等准其隨同立功自贖惟訊據獲賊供稱城內賊匪約有萬餘張逆眷屬輜重俱在其中大小著名賊首尙多第次日未見張落刑等語該逆是否見賊巢將破改裝易服潛匿城中隱僻地方或乘官軍與援賊鏖戰之際昏夜縋城越濠逃遁均未可定見惟催督兵將及苗練等迅圖攻破縣城查明張落刑實在下落卽移兵進搗蒙毫老巢務期次第殲除力擒首惡西竄擒

匪於三月十四五等日擾及河南洛陽十七八等日復向西路分竄澠池孟津一帶俱有賊蹤山陝頗形喫重二十二三等日又向西南之宜陽汝州滋擾勢將回竄則陳州之周家口仍應豫爲防範沈項迤南新蔡息縣一帶尙有匪蹤出沒亦須撥兵次第辦理臣查看情形如潁上卽日克復一面督令苗練進擣蒙亳賊巢一面籌撥馬步仍回陳郡或赴汝甯親督勦辦以期痛殄西路賊氛又奏查已革川北道苗沛霖自二月初間臣抵皖後見其隨同官弁攻圍潁上辦理尙屬認真至從前屢立戰功尤屬眾所共見是以臣許令帶罪立功勉圖自贖惟該練人數眾多其中良莠不齊茲查有苗練七營營長四品花翎林濟川自咸豐九年冬間卽勾結捻匪爲害地方迨經苗練收令入營該犯仍敢勾結張落刑占踞潁上助賊抗拒此次臣親赴潁上苗練各營無不匍匐道左惟

令是遵而該犯避匿私圩不出實屬居心叵測反覆無常臣卽派營總富明阿帶領馬隊馳赴該圩出其不意將林濟川提到臣營訊明助捻屬實當將該犯正法以昭炯戒 上諭議政王軍機大臣等官軍於奪回穗子鋪後併力圍攻邢家灣賊圩自可剋日攻拔惟上年張落刑自定遠窮竄彼時卽可撲滅乃苗沛霖放其渡淮俾令占踞潁上圍攻潁郡迨南北官軍進援潁郡苗練遂圍潁上聲言俾賊回顧而又任聽張逆糾眾攜眷竄回老巢是苗沛霖名爲協助官軍實則縱之使逸勝保此次奏稱訊據賊供稱張逆眷屬尙在潁上城中惟數日未見張落刑等語是明知該逆他竄乃故爲隱約其詞謂俟攻破縣城再行查明張逆實在下落豫爲克復後占腳地步並力陳苗沛霖感愧之象似出至誠尤屬意近開脫不知苗沛霖叛蹟昭著不卽加誅朝廷寬大之恩已屬極至

若但以其收復空城輒許受撫受其反覆之欺恐降眾相率效尤更難措置總宜令其殲斃張落刑方可自明心迹斷不准以攻克潁上空城及將來進攻老巢等詞藉以懇請恩施林濟川反覆無常自應立正軍法惟苗練良莠不齊誠恐居心叵測者尙復不少該大臣務當隨時偵察妥辦毋得稍存姑息將此由六百里諭令知之○都興阿奏逆眾二十餘萬突來揚州城下晝夜撲犯幸我軍爭先奮勇以少擊多該逆屢經勦擊著名悍賊傷斃甚多無從施其狡詐四月初一日遂乘大雨夜遁當派候補副都統杜嘎爾徐州鎮總兵詹啟綸等率兵跟追該逆退至龍虎集徐家集新城一帶踞險紮營經我馬隊分投衝殺紛紛逃遁殺斃數百名天晚收隊臣查揚防軍務守重於戰惟就見有兵力聯絡布置庶幾完善可保此次大股逆匪勢甚猖獗揚防雖萬分喫緊臣未敢乞援

他處蓋恐客兵未悉情形或務虛名而受實害也惟臣止能守禦
揚防不能兼顧浦六自愧才輕任重有負 天恩仍仰懇 皇上
另簡大員來揚接辦則江北軍民幸甚 上諭逆匪大股攻撲揚
城前據都興阿疊次奏報均經覽悉並經寄諭該將軍際此勢處
萬難正應公忠體國力濟時艱不得遽請另行簡員致敬愼之忱
轉同於推諉至該將軍所部兵力不敷分布亦經諭令俟李鴻章
之軍行抵鎮江便可聯絡聲勢著都興阿仍遵前旨於李鴻章到
鎮後將一切攻剿事宜和衷商辦以副委任將此由六百里諭令
知之○命嚴定稽查城倉各庫章程○癸亥西安將軍托明阿陝
西巡撫瑛棨固原提督孔廣順西安副都統烏蘭都前任都察院
左副都御史張芾奏賊匪於三月十九二十等日連次攻撲商南
縣城經該處防軍開放槍礮斃賊多名並生擒長髮數賊訊係粵

匪由廬州走新蔡南陽等處窺伺陝境賊首係僞啟王等語該逆見城守甚嚴未能得手遂卽西竄圍攻商州經知州曹熙等督率紳民極力守禦適臣孔廣順統帶兵勇趕到城圍遂解見分竄孝義廳屬之蔡玉窯葛牌鎮等處且聞尙有續來股匪見已挑選滿營精壯馬隊四百名由臣烏蘭都統帶前往尹家衛屯紮一面飭催各路官兵馳赴大營由臣孔廣順督率痛加剿洗河南府一帶擒匪竄擾永甯宜陽等處潼關已在喫緊業經行知該道協先就見有兵力妥爲防範惟探得豫省撫臣督帶大兵駐紮汝州又派馬步數千由河南府尾追賊無歸路必致愈向西竄若與前股糾合滋擾其患何堪設想相應請旨飭下河南撫臣鄭元善嚴飭帶兵副將楊飛熊督帶馬步繞出賊前由西面迎頭截剿東路有鄭元善大兵堵禦兩路夾攻不難一鼓殲除上諭議政王軍機大

臣等孔廣順見抵商州卽著責成調度妥爲堵遏瑛榮前奏道員周祖頤帶勇七百名赴商南防剿何以此次任賊西竄未見該道帶兵攔截其爲未能得力已可概見並著瑛榮等嚴飭實力攻剿不得稍涉瞻徇河南捻逆竄擾永甯宜陽等處距潼關不遠該處原設防兵前已調赴商南見在是否可以酌量調回何丙勲年逾七旬所帶撫標兵一千名是否足資堵禦該撫等務當破除情面嚴覈功罪設有疏虞被匪闖入必將該撫等重治其罪孔廣順向來帶兵得力久著聲威但獨力究恐難支著鄭元善卽飭楊飛熊督帶馬隊各軍繞出賊前迎頭截擊鄭元善勇於任事諒不肯以驅賊出境卽爲塞責至河南府另捻竄至永甯設由觀音堂等處北竄則晉省亦應防範所有茅津渡東灘渡等處卽著英桂嚴飭護總兵和昌等妥爲防堵毋稍疏虞川匪鄧添亡一股竄至南鄭

縣屬新集一帶該鎮道等節節退守任賊東竄直至逼近漢中郡城殊屬可惡著瑛榮嚴飭該鎮道等將前調陝安鎮兵一千名催令前往竭力攻剿儻漢中有失必將該鎮道等軍法從事哈連陞已簡放漢中鎮總兵著卽飭迅速赴任責令認真堵剿駱秉章前在湖南援剿鄰省毫無歧視卽著傳諭毛震壽統帶得力兵勇一千名並揀派精幹將弁管帶兼程赴陝該藩司於行抵漢中後相機勦辦務令與川兵兩面夾擊殲除淨盡該處鎮道防兵統歸調遣以壯聲威所需行裝口糧著駱秉章先行墊解仍由陝省解還以清款項川省道路恐有阻滯著官文嚴樹森瑛榮於接奉此旨後卽各照錄一分飛遞咨行駱秉章免致延誤將此由六百里加緊諭知官文駱秉章嚴樹森英桂瑛榮鄭元善孔廣順張芾並傳諭毛震壽知之○諭慶端奏官軍攻毀大港頭賊營見飭各軍進

勦等語處郡踞逆與松陽遂昌各股逆匪窺伺龍泉爲圖擾閩疆之計見在遂昌既經克復雲和景甯之匪亦經擊退難保該逆不鋌而走險蔓入閩境龍泉係浦城松溪各縣門戶遂昌與衢州之龍游江山壤地相接並有閒道可達浦城見在處溫兩路兵力漸集著慶端卽飭林文察等軍合力進勦將處州郡縣各城規復迅掃逆氛前聞閩兵數千由峽口出隊被賊匪包鈔失利該逆追過峽口方行收隊峽口爲江閩要隘與浦城相距甚近中間止隔仙霞一關慶端見駐浦城何以未據奏報如果峽口被陷則逆勢可以直趨廣玉亦可以竄入閩境江閩邊界在在堪虞著慶端左宗棠會同商酌嚴飭各軍四面夾擊毋令旁出肆擾將此由六百里各諭令知之○以王茂蔭署左副都御史候補侍郎○予陝西陣亡遊擊張鎮遠等祭葬世職○甲子諭內閣吏部等衙門奏遵旨會議

統兵大員處分一摺欽差大臣兵部左侍郎勝保前於投誠之勇
日已革參將宋憬詩離營逃遁已閱兩旬不行奏報意存回護當
經降旨交部議處茲據該部等奏議以降二級調用實屬咎有應
得惟念該大臣督兵勦賊平日尙稱得力著加恩改爲革職畱任
以示薄懲○官文曾國藩多隆阿奏廬郡城大而堅護城河身甚
寬首逆陳玉城率悍賊四五萬眾嬰城固守眾軍雖四面進紮均
難近逼城身袁甲三派總兵張得勝率勇五千餘人駐紮橫店尙
離城十餘里未克進逼臣多隆阿籌思再四擬將河水挖放以便
攻城遂於二月二十六日乘沙霧迷漫派總兵雷正綰率領所部
列隊東門南門得勝門沿河一帶佯作攻城之狀飭副將朱希廣
陶茂林等督兵馳赴東門又飭總兵石清吉率五營馳赴西門均
距城里許埋伏以防城壘之逆分襲我後復飭臣所部親兵四營

多帶鋤鋤更替它隄地勢外高內窪城上槍礮絡繹施放我軍自二十七日至二十九日不避艱險連夜出隊決放河水詎城賊偵知眾軍它隄由東門西門突出賊眾七八千人分路來撲經朱希廣陶茂林石清吉等伏兵齊出該逆知我有備未敢迎敵敗退入城三月初一日在東門城外搜獲陳逆致偽扶王陳得才等密文三件均係調潁州河南等處賊眾分股回救廬郡並屬陳得才點足精壯悍賊二萬人由壽州一路來撲又探聞江南之賊紛紛渡江聲言救援廬郡伏思南北兩岸援賊同時蠢動陳逆狡謀善戰死守待援我軍戰守機宜倍宜慎重等自當嚴飭各軍一面迎剿援賊一面進攻廬郡以期迅克堅城上諭議政王軍機大臣等廬郡城大而堅護城河身甚寬多隆阿因春水漸漲官軍難逼城下派兵更替它隄決放河水並將城內出撲之賊擊退惟地勢

外阜內窪所決隄岸務須就外面地勢較低之處開挖河道以便水有去路方不至徒勞無功著官文曾國藩卽飭多隆阿相機辦理見獲陳逆致僞扶王等密書欲調潁州河南等處並壽州賊匪回援廬郡多隆阿務宜乘援賊未至之先督飭諸軍迅速進攻張得勝一軍見在駐紮橫店著袁甲三卽飭該總兵乘勝進逼城下會合楚軍迅克廬城毋令垂盡之賊餘燼復然該逆被圍緊急難保不出巢湖水路難出擄糧並著多隆阿將東面水路一帶設法嚴防以潯城中接濟兼可堵遏逆匪竄逸之路李續宜見已馳抵六安著卽籌添兵勇會合進攻其路通潁壽各要隘並著袁甲三李續宜會商分派將士嚴密堵截以杜該逆回援之路將此由六百里各諭令知之○予安徽陣亡遊擊余三義等祭葬世職○乙丑諭議政王軍機大臣等前據勝保奏圍攻穗子鋪邢家灣賊巢

屢勝馳赴潁上察看縣城可望克復當經寄諭以苗沛霖受撫一事總須令其殲擒張落刑方可自明心迹諒該大臣不至更爲所搖惑轉以自欺見在邢家灣賊圩是否已克苗練一事如斷無可撫自應及早會合諸軍實力剿辦若如所陳感悔之象似出至誠究竟有何把握亦應妥實辦理毋稍遷就貽患將來該大臣如能將苗練一事或剿或撫迅速辦理悉歸妥實亦可移軍而西以紓睽顧將此由六百里諭令知之○諭李續宜身任皖撫地方軍務責有攸歸前經疊諭該撫速赴潁州此時該處軍務正當喫緊苗練一事亦須趕緊及時籌畫不可濡滯李續宜旣抵六安仍著帶兵赴潁並將籌畫進發各情馳奏以慰廑念將此由六百里諭令知之○諭譚廷襄奏辦理樂陵偽團並籌防教幅等匪情形各摺片偽團鄭純等藉團抗官爲日久雖聞兵勇擒拏逃遁難保無

餘黨潛匿該撫所奏各情誠恐尙有不實不盡著卽嚴飭地方文武認真按捕務將鄭純首匪擒獲淨絕根株以除後患另片奏教匪馬步隊屯紮曲阜泗水蒙陰竄賊與南泉踞匪合併圖犯平邑敗退後閉門扼守該撫已飭遊擊緒綸等軍分路進攻著卽督飭各軍實力埽蕩斷不可任令教幅各匪聯絡一氣致滋蔓延將此由五百里諭令知之○諭駱秉章奏追剿李逆大獲勝仗一摺川省軍情見甚得手如該逆等被剿窮蹙勢必竄擾黔滇邊界黔省賊勢尙張若再與川匪勾結剿辦更形棘手滇省地方糜爛見值自顧不遑勢難分兵堵禦川匪著韓超田興恕速撥勁旅在於毗連四川之黔滇邊界一帶迎頭截擊會合駱秉章派出官軍兩面夾攻爲一鼓殲除之計毋令該逆竄入黔滇邊境將此由六百里諭令知之○駱秉章奏石逆大股沿江南竄由南沱一帶竄至涪

州城外小河對岸山梁屯紮涪州知州姚寶銘等督團堵禦該逆勢不能逞乃由小河上游之朱家觜等處涉淺偷渡直撲州城姚寶銘等登陴固守該逆圍攻不退臣所派之已革知府唐炯帶黔勇由重慶水路下駛於三月十二日抵涪副將唐友耕一軍繼至適臬司劉嶽昭前隊亦到該逆正挖掘地道意圖疾攻當經唐友耕分隊進城一面會商唐炯等分路進剿在籍參將徐邦道亦帶練勇出城夾擊各軍往來衝殺乘勢搶據山梁賊遂紛紛潰竄我軍立將仰天窩堡子城一帶賊壘概行踏毀是日共計殺斃逆並生擒之賊八九千名城圍立解臬司劉嶽昭親督後隊於十三日馳抵涪城探知該逆已敗竄箇市鎮一帶慮其由南岸浦偷渡北岸適道員張由庚馳至李渡溪劉嶽昭等卽令暫駐該處以扼北渡兼防鶴遊坪之賊劉嶽昭唐友耕各率所部渡江由北岸捷

徑馳赴重慶鈔至賊前以便攔頭截擊唐炯率勇暫駐涪州以防賊回竄並復飛飭劉嶽昭等約會唐炯上下夾擊爲一鼓聚殲之計上諭李逆敗竄天洋坪雖經該處團練圍困難保不抵死衝突而卯逆擁眾近萬敗竄宜賓之八角寨該處去自流井貢井不遠恐其竄擾廠地該督已飛飭何勝必等先將卯逆一股殄除再攻天洋坪一股著卽督令速攻毋任蔓延爲患李逆一股卽嚴飭該處團練實力圍剿或添兵協助以防竄逸石逆圍撲涪州新到各軍力戰解圍賊已敗竄蘭市鎮一帶劉嶽昭等馳赴重慶鈔至賊前攔截防賊北渡唐炯仍駐涪州防賊回竄調度均合機宜著卽飭令該鎮等兩面夾擊一鼓殲除涪州與瀘州一水可通若石逆與李逆合併一處辦理又形棘手並著飛飭江面督帶水師各員晝夜梭巡不可稍有疏失務將該逆悉數殄滅以靖地方陝西

陽平關股匪由川竄入前已有旨令駱秉章妥籌兼顧著該督派撥精兵一千名交藩司毛震壽統帶飭令卽赴漢中相機調遣如兵力不敷仍著妥籌辦理將此由六百里諭令知之○添派禮部左侍郎察杭阿恭理喪儀○廣江西甯都州學額九名○丙寅吳棠奏擒逆敗退至山陽西鄉漢河一帶後卽在該處插列旗壘數十座意圖踞爲巢穴黃國瑞於三月二十五日帶隊闖入漢河圩內奮勇衝擊斃賊一百餘名立將漢河攻克餘賊潰竄歸入漢河西南之觀音寺呂梁橋各賊壘二十六日臣又添派參將穆恆德等帶隊助守漢河二十七日黃國瑞等正擬出隊進攻賊已分兩路來撲漢河黃國瑞卽一面畱隊守圩一面與慶連等帶隊迎擊自辰至午相持未下黃國瑞選帶精壯小隊五十餘名衝入賊陣刺斃執旗馬賊十餘人官軍一齊進攻賊眾敗退黃國瑞等追殺

十餘里斃賊無算餘賊竄向仁和集黃家集一帶其高澗一路經
通判秦如葵等扼守臣添調知州楊德昌等礮船駛往助守繼又
派參將姚廣武等帶隊千名前往二十七日行抵該處遇捻股千
餘人窺伺姚廣武等帶隊直前格鬪逆眾未及列仗被官軍衝潰
斬首百餘遂由賊中轉戰得達周橋以通蔣壩之路當該逆竄擾
汧河時卽分股徑撲蔣壩復經總兵安勇副將蔡觀賢等軍晝夜
併力堵截出奇邀擊壘在周橋古溝智壩塘八里隄等處殺賊多
名該逆不能闌入臣以該逆屢挫勢已窮蹙當卽札調署淮徐揚
海道張富年督率馬隊由宿遷馳抵清江以備追截四月初四日
黃開榜會同蔣壩汧河高澗各軍分路向觀音寺仁和集一帶進
擊斬馘三百餘名餘賊由桃南之涸灘奪路西竄臣又派署副將
袁世功等暨張富年馬隊共六百名跟蹤追剿初六初七等日官

軍迫至成子河倉家集等處該匪晝夜狂奔已由靈泗交界之滄塘溝等處西竄老巢桃宿境內一律肅清臣見仍竭力布置以備戰守斷不敢稍有鬆懈 上諭內閣吳棠奏官軍堵剿捻匪疊勝

並添調馬隊追擊一招該匪晝夜狂奔遁回老巢宿桃境內一律肅清仍著吳棠等督飭各將弁實力剿洗盡殲醜類毋任紛竄○左宗棠奏查僞侍王李侍賢率巨股由金華龍游上犯衢城於東南路之大洲等處連營數十里衢州鎮總兵李定太署衢州鎮總兵崇志署金衢嚴道江允康署衢州府知府吳艾生等嬰城固守二月十八日臣率各營馳抵常山水南地方探聞該匪分股竄踞招賢一帶衢城糧運隔絕將成坐困之勢卽派知府劉典督同都司張人和等各率所部由左路進同知李耀南等各帶所部由右路進同知劉璈等各率所部相機接應十九日齊抵招賢該逆不

及列隊棄械狂奔我軍奮力追殺斬馘二百餘級於是衢城糧路始通賊之犯江山縣城者屯踞北路大溪灘栳竹街四都一帶東路塘源毛村一帶又聞侍逆李侍賢由大洲竄至江山調金華巨股前來臣檄署藩司李元度嚴密堵禦一面派隊分兩路至四都栳竹街截殺三月初一日甫行抵大陳地方該逆偵知大軍將至卽於是夜遁走其塘源毛村之賊屢犯江城俱經李元度擊退初三日李元度親率十營分路進剿毛村賊巢行抵盤窰地方僞主將譚星率眾萬餘列隊抗拒遊擊喻科癸等首先衝入賊勢不支參將李正盛等各率所部從清湖繞出賊後賊卽奪路狂奔各軍乘勢追擊忽小清湖賊萬餘過河來撲李元度卽率各軍回援喻科癸李正盛亦分路齊進立斃悍賊百餘名追殺六七里是日兩獲全勝殺斃溺斃者數百名初五日該逆復糾黨上竄撲犯峽口

閩軍營盤圍軍先勝後挫退回浦城賊遂於該處屯紮肆行焚掠下自清湖花園港口門江郎街等處上至峽口鳳林等處連營數十里勢復猖獗臣以其地達福建之浦城浙江之處州龍泉江西之廣豐玉山臣儻此路有失不獨臣軍後路可虞大局必不堪問當飭劉典督帶四營先行並派李元度安越軍六營會剿初七日劉典等行抵江山縣新塘邊適賊前隊亦至劉典當派三成隊追剿殺賊多名直至河邊該逆梟水而遁臣詢知侍逆竄踞花園港結壘自固初八日分三路進攻花園港賊巢劉典自率中營由中路進殺賊數百侍逆李侍賢率眾遁竄適大雨如注收隊而還臣因賊勢趨重於此隨督各軍繼進十五日進紮江山縣石笏地方是日探報侍逆由小清湖過河窺探路徑並有步賊數百散居村莊臣一面調副將顧雲彩八百人助剿一面飭劉典於十六日督同黃

少春等至清湖一帶按剿甫抵該處賊見我軍紛紛潰走忽花園港石門出悍賊萬餘排列禮賢上下一帶山岡而以數千人涉淺過河徑撲安越軍營壘朱明亮督勇堵截斃賊數十名賊勢少卻劉典率各營馳至該逆奪路狂奔我軍追殺二十餘里其鳳林股匪竄至毛坂冀襲我軍後路者亦經顧雲彩等擊走十八日臣親督同知楊昌濬等軍由江郎街進發連破石門賊卡數重直擣賊巢追殺十餘里至午刻抵花園港各營畢集三面環攻該逆見我軍銳氣百倍堅匿不出賊之潛伏清湖者突起鈔我歸路經安越軍於河邊扼擊敗退據探李侍賢約僞對王洪逆糾集大股賊黨又由衢州西北而來臣以賊援將至而花園港老巢未破我軍將有腹背受敵之虞二十二日黎明仍飭各營三路進攻賊壘垂破復完總未得手二十三日李定太江允康等函報援賊僞對王洪

春元率黨數萬已至雙橋二十五日我軍移營進紮一面攻撲老巢一面迎勦援賊而該逆卽於是夜向上臺毛村一路潛遁李侍賢負隅自固於形見勢詘之餘猶復堅忍相持拌死抗拒又糾合巨股來援意在闌入江西今援賊爲臣軍所阻或由衢州仍回大洲全旺老巢或由遂昌竄向龍泉均屬未定臣見在畱安越軍八營及江西仁右營副將顧雲彩長左營卽補道王德榜等照舊駐守與江山各營聯絡一氣以固江西藩籬一面飛飭總兵崔大光等四營回軍華埠相機截擊臣自率各營卽日由常山跟蹤追勦以期悉數聚殲上諭左宗棠奏官軍回援衢州江山兩城圍解一摺勦辦甚屬認真著左宗棠督飭各營官軍跟蹤追勦務令悉數殲除毋畱餘孽○左宗棠奏官軍攻克遂安縣城後臣令道員王文瑞等駐守旋據稟稱二月二十日起大股賊匪由淳安竄近

遂安分東北兩路圍撲城垣王文瑞等飭各營堅壁勿出靜以待之該逆旋即退去二十三日東路之賊直逼城外營壘王文瑞令總兵丁長勝等率軍衝殺斃賊多名該逆敗潰我軍猛追十餘里始行收隊甫近城壘忽北路之賊又乘虛來犯副將王明輝督各哨極力堵禦康榮詔等分路擊之賊又大敗是日兩戰約共殺賊二千餘名先是探報另股賊匪將由東亭來援而北路敗賊亦歸併東路二十八日擁眾五六萬直至城東築壘王文瑞憑城穩守見賊勢稍懈卽飭卞長勝等分路出擊王文瑞自率親兵督戰雖斃悍賊多名而該逆略無退怯迨丁長勝郭德馨等由後路鈔出始各敗退各勇乘勢連破諸壘該逆四散狂奔一由淳安港口竄嚴州一由濟嶺竄徽州屯溪休甯而去臣已飭王文瑞嚴密守禦並令總兵崔大光等四營相機應援務期力扼要衝上諭遂安

官軍兩次擊賊獲勝立解城圍剿辦甚爲得手仍著左宗棠督飭諸軍將敗殘各匪悉數殲除毋畱餘孽○田在田奏據總兵胡元昌稟稱西捻竊臣東援宿蕭畱兵無多乘閒闖入高黃山等寨擾我腹地並聞首逆張落刑由南路敗回雒河連日至孫疇等處糾約眾捻首來會李城等又遣黨就奶奶山以西古饒集等寨扼河屯踞宿東尹家窩一帶亦因練匪丁潮臣等煽惑時復西來兩路勾結驛路梗阻又臣吳棠函稱續竄捻股回至桃源臣聞報後馳回夾溝申諭各圩勿爲賊誘一面調齊各隊親統前進四月初一日至高黃山東賊卽列仗來迎我軍奮力壓退追至山腳擇要駐紮斷其樵汲該逆立腳不住是夜潛撤西去併入古饒集半壁峭等圩臣卽就符離集駐紮派隊在高黃山後橫口挑築營壘賊眾馬步千餘突由西來衝擾兵勇當卽迎敵奶奶山下前寨防兵亦

出接應賊始撤退詎另股悍賊冒入奶奶山後寨襲踞其中該處地勢居高臨下匪眾礮石連環下面各寨之兵均難支拄駐防該處之都司馮傑恐來路隔斷反成坐困不得已乘夜撤回初五日賊復勾結東北尹家窩等匪擾我赴徐大道經臣親督各隊就黃花洞一帶衝擊偪歸西路初六日飭馮傑等仍帶隊伍由山東搶赴前寨其餘馬步均往橫口接應將近山根捻首趙克元糾黨萬餘人由西遙擁而來勢極兇猛我軍合力鏖戰兩時許賊始敗退連日探悉張逆等在臨渙裝齊五旗分東西兩路竄擾賊情狡詐所向均難豫定臣營僅此兵力能否極力維持尚未確有把握設另股再由他路出巢竄恐難以兼顧惟當相機籌辦不敢稍涉鬆懈上諭議政王軍機大臣等張逆前在潁上與苗沛霖狼狽爲奸早已料苗練必縱令他竄今該逆已竄至臨渙而勝保仍有心

祖護總由主撫之見膠執胸中不知賊情狡詐處處爲所蒙蔽著
勝保迅將潁上縣城立時克復並將苗練如何縱令張逆攜眷竄
出情形據實具奏臨渙西路距永城不遠該處爲歸德後路見在
攻勦金樓正在喫緊著僧格林沁妥籌防範毋令突出掣動大局
惟該逆聲東擊西是其慣技田在田兵力不敷亦係實在情形袁
甲三身膺督辦之責著迅卽酌派官軍會同田在田力遏東竄免
致慢及徐城庶清淮不至再被蹂躪至苗黨丁潮臣肆掠焚搶實
屬罪不容誅前袁甲三因勝保函商卽准其率眾赴潁竟不奏明
請旨已屬縱匪殃民況苗沛霖反正既無確據何得畏其以爲口
實稍涉遷就勝保既令其赴潁仍不遵旨嚴加鈐束任令竄擾尤
屬非是著勝保袁甲三田在田務將該逆痛加剿擊殲除首惡以
贖前愆懲任令丁潮臣再行竄逸惟勝保袁甲三是問至奶奶山

既被賊占後寨又被賊冒入該處駐守都司馮傑所司何事何以並未參奏卽著田在田迅速進紮山下督飭各軍將奶奶山等處克復乘勝而西攻克古饒集等處毋稍遲誤將此由六百里各諭令知之○諭慶端奏閩浙各軍連日剿賊情形一摺逆黨上竄峽口撲犯閩軍營盤閩軍退回浦城賊遂於該處屯紮肆行焚掠已經左宗棠據實馳陳而慶端則但稱逆匪來偏峽口副將會元福整隊迎敵殺賊甚多復稱侍逆大股突至峽口各營眾寡不敵稍有挫失等語不但敗退情形諸多含混卽摺內所陳各節前後亦自相矛盾慶端以獲咎畱任之員自當激發天良力圖補救乃奏報軍情竟敢任意欺飾而於將領中之挫敗無能者並不卽時參劾實屬形同聾瞶見在該逆向上台毛村一路潛遁則閩境更覺可虞瑞安景甯雲和等處之賊雖報擊退難保不去而復來慶端

務當督飭閩省能事將領會同浙軍將峽口鳳林等處賊營併力
勦洗嚴杜浙賊入閩之路以期稍贖前愆儻再不知愧奮任令賊
匪竄入閩疆或闌入江境該督恐不能當此重咎也將此由六百
里諭令知之○廣浙江西安縣學額三名○丁卯允毛鴻賓借運
粵鹽充餉○命常績來京以鄭敦謹爲山西布政使由大理寺卿遷○戊
辰曾國藩彭玉麟奏自逆匪分踞江北占定險要阻我進兵之路
江蘇布政使曾國荃到防後與水營總兵李成謀成發翔等分撥
陸隊會合水軍剋期進取三月十五日曾國荃自率十三營由林
臺過河以偏巢縣東北一路並令劉連捷赴望城圖堅修營壘以
扼巢縣正南一路復令朱寬義等馬步各營助之營牆甫築數尺
巢城之賊分股來撲眾軍迎戰斃賊四百有奇餘悉潰走各營駐
紮既定曾國荃派陳湜蕭孚泗成發翔等帶淮揚師船夾勦銅城

牐之賊維時成發翔先撥數營駛入清溪河親率所部同蔡東祥
賴榮光陳東友歐陽利見來會於銅城牐渡口十八日我軍齊進
賊卽出拒戰不逾時成發翔歐陽利見帶隊登岸繞壘大呼眾勇
抽刀環刺遇者輒斃賊乃棄壘散竄立將該鎮克復銅城牐之前
則有雍家鎮爲焦湖之鎖鑰亦巢舍之外藩十九日水陸兩軍乘
勝進取陳湜李成謀等各由白茅觜分路登岸四面環攻岸上賊
眾悉遁入船河中賊划復被轟擊入水倖脫之賊十不及一雍家
鎮亦卽收復當進攻該鎮時曾國荃親率陸師星夜渡河已至巢
縣之背連營旗山鼓山一帶王東華水師亦由清溪河進次巢縣
之東門外至是成發翔歐陽利見各率礮划先後駛抵河下併力
奮攻忽見城中煙燄橫飛旋獲賊諜訊供逆首偽顧王吳于哮偽
封天義徐侗江因巢北陸師進而合圍歸路已斷焚屋燒糧圖向

含山宵遁曾國荃急令劉連捷等營協同水師於二十日會復巢縣而自將張勝祿武明良李臣典等十三營及楊鎮南所部騎卒三路跟追縱軍截殺伏尸數十里乘勝馳抵含山城外該城守賊不敢拒戰相率竄奔各軍遂入含山縣城二十二日曾國荃復拔營疾進偵知巢含漏網賊渠尙在鍼魚嘴過江乃以偏師向鍼魚嘴而以正兵進襲和州逆首僞東天義劉惟久僞同天安尹賢瑞未及糾眾交鋒各營乘勢截剿殺斃甚眾追至鍼魚嘴合軍剿洗江流盡赤遂將和州克復北岸要區悉爲我有所未得者裕溪口而外尙有西梁山爲第一重險二十三日曾國荃統全勝之軍與水師循江而上此時李成謀外江水師成發翔內河水師及蔡東祥等淮揚水師早至西梁山下曾國荃一軍馳至見該處倚山爲險勢難仰攻令水師扼江面以擊賊船陸師布長圍以困賊壘是

夜曾國荃結營冒雨偪壘而陣賊竟悉眾出壘向江洲一路衝走
水師陸師爭起搏擊該逆紛亂引領受誅罕有脫者遂奪取西梁
山撥軍駐守此次各軍異常奮勇連克城隘除曾國荃不敢仰邀
議敘外其尤爲出力及陣亡各員弁謹先行開列懇恩飭部分別
獎勵又奏賊首僞匡王賴汶鴻敗入繁昌復約踞賊僞佐將林有
志等糾黨八千餘人嘯聚松林口將謀再逞三月十九日分四路
迤邐而來曾貞幹令黃潤昌等各出六成隊伍分道馳剿並令晏
基山等營鈔出三華山麓策應各營兼備老山襲後之賊尙未拔
營賊隊齊至更番迎撲時值風順礮利先將賴林二逆乘勢擊卻
羣賊大亂蒼黃欲遁逆渠吳大鰲猶恃老山伏賊未發回鞭轉圍
驅眾向前曾貞幹親率曾正明等突入垓心槍擊吳大鰲殲之縱
橫盪決所向盡靡敗匪先後潰至馬口地方爭渡溺死無數曾貞

幹乘此聲威令黃潤昌等各撥兩哨攜帶雲梯向松林口疾馳而進悉抵城下曾貞幹所部湘恆營設伏於松林口內一應攻城之官軍一防蕪湖之賊援時至五更我軍奮勇攻城瞥見賴逆先率醜黨由南門拔關而遁急回軍兜截曾貞幹率曾正明馬步伏兵前來夾擊賴逆奪路向南陵涇縣竄走維時薄城將士愈攻愈奮一擁盡入合力接剿林逆率敗殘餘匪乘間潰逃遂於二十一日克復繁昌縣城計兩日之戰擒賊三十四人斃賊一千六百餘人各營將弁著有微勞除曾貞幹係臣胞弟不敢仰邀議敘外所有尤爲出力各員弁謹先行開列奏請飭部獎敘又奏據曾貞幹函稟三月二十七日水陸會同克復魯港要隘盪平石壘石卡奪獲賊船賊礮甚多三十日克復南陵縣城其詳細戰狀俟具稟到日續行奏報近日大江南岸克復城池六座關隘一處北岸克復城

池三座關隘一處多隆阿圍攻廬州狗逆陳玉城固守不出四面
援絕當易得手左宗棠一軍與僞侍王轉戰於常山江山一帶十
六十八二十等日屢獲勝仗埽盪賊壘無數臣見在飭催鮑超一
軍一面進圍甯國一面派隊由廣德馳救湖州 上諭內閣曾國
藩奏曾國荃一軍克復巢縣含山和州並銅城牯雍家鎮裕溪口
西梁山等處曾貞幹一軍克復繁昌縣又據稟稱奪回魯港要隘
攻克南陵縣該大臣調度有方深堪嘉尚本當再沛恩施用彰殊
眷惟該大臣前次力辭節制四省至再至三並另片奏稱一門之
內數月之間異數殊恩有加無已感激之餘繼以悚懼懇求金陵
未克以前不再加恩等語情詞懇摯出於至誠此次應卽俯如所
請不再加恩至曾國荃等宣力戎行連克要隘洵足以褫賊魄而
快人心若不量予恩施將何以昭激勸頭品頂帶江蘇布政使曾

國荃著交部從優議敘候選同知直隸州知州曾貞幹著賞給迅勇巴圖魯名號以示鼓勵朝廷賞功罰罪一秉大公非獨有厚於該大臣也該大臣惟當督飭曾國荃等乘勝進攻盡殲醜類同膺懋賞毋再固辭○曾國藩奏浙江提督鮑超一軍攻拔青陽後料該逆立腳未定利在速攻卽於三月二十一日由龍口率隊前行直抵石埭城壘各賊閉關死守鮑超飭令婁雲慶等分軍爲五翼時合圍附郭諸壘穴牆施礮向外猛擊我軍佯卻數武使賊少懈突將火器環壘飛擲然及哨棚各營乘賊駭亂填濠而進殪賊無算踰平十四壘將賊驅入城中城上礮石交下將弁頗有傷亡婁雲慶李文益熊鐵生顏紹榮等各親冒矢石奮勇搏戰遂從西北二門斬關而入立復城池該逆奪路狂奔追擊二十里斃賊五千有奇俘獲近四百人石埭旣復賊愈惶懼因糾合援賊二萬餘眾

由涇縣南陵而來羣集於甘棠鎮阻我師之進路二十二日鮑超率馬步全軍倍道馳往文九和等三營先從中路進擊劉順隆等六營分兩翼包鈔馮標等忽由山後整隊齊出衝動賊陣不復成伍盡棄甘棠賊壘十七座而逃我軍悉力追逐進薄太平縣各軍齊上賊遂啟東門望涇縣大道而逸當將縣城收復併擒僞主將徐國華僞安天義蕭幅勝等三十七人訊據供稱僞奉王古逆已爲亂軍衝散先是鮑超進取青陽正在圍攻未下忽有僞佐將張遇春率眾萬餘來營乞降鮑超以勁敵在前遽收降眾恐生他變諭令暫駐旌德之三溪至是太平敗匪遁出黃華嶺外不滿七八千人將圖折入三溪忽見張遇春整隊而來出賊不意縱橫格鬪殺賊三千餘名生擒八百餘名古逆一股幾無孑遺時鮑超已回甘棠旣得張遇春獻捷之信旋聞涇賊將由灣灘至鳳村上竄二

十七日傳集各營並張遇春降卒成軍以進將及鳳村賊已聞風遁入灣灘我軍奮勇疾馳遂薄灣灘下寨該逆惶遽失措不能歸壘唐仁廉馬勝奎舉旗縱馬直擣中堅盡破灣灘卡壘躡賊尾追至於城下梅仁富先破西門水卡唐仁廉等隨毀東南土壘一擁入城登時克復涇縣查石埭太平南蔽黟歙涇縣東達宣城爲戰守所必爭鮑超一軍自拔青陽後未逾七日連復三城從此進剿甯國漸有把握在事出力員弁兵勇可否容臣彙入青陽一案保獎之處出自恩施 上諭此次鮑超一軍自拔青陽後未逾七日連復三城剿辦甚爲得手殊堪嘉尚仍著曾國藩飭令鮑超乘此聲威迅將甯國一帶踞匪悉數殲除毋任久踞○諭薛煥奏官軍約會英法將士將南翔羅店賊壘埽平並克復嘉定縣城各摺片據稱三月二十七等日經薛煥派隊會合英法兩國之兵進攻南

翔各將弁逾壕而進擊斃髮逆多名追至鎮外鶴蛇山逆營死力
堅守英法兩國將士督隊與官軍齊進直逼牆壕四月初一日官
軍分隊進剿逆匪棄營西竄追斬甚多當將南翔一帶賊壘埽平
直抵嘉定城外其羅店賊壘亦經薛煥派隊進剿陣斬黃衣賊目
偽樁天燕等四名羅店賊壘一律埽平我軍遂會同英法將士並
常勝軍將嘉定縣四面合圍分路環攻於初三日克復縣城辦理
尙屬得手著卽迅飭各員并乘勝進攻將失守各城次第規復英
國帶兵官受傷並著薛煥加意存問傳旨嘉獎○諭議政王軍機
大臣等曾國藩奏稱克復巢縣含山和州並克復石埭太平涇縣
暨擊退三山賊眾克復繁昌又據稟奪回魯港攻克南陵派兵進
援湖州各摺片近日江岸南北連克城池並關隘多處事機急爲
順利據該大臣奏稱各路賊匪情形頗有慌怯之勢宜乘此聲威

一氣掃蕩著卽飭令鮑超等各軍迅將甯國府城攻克進取廣德以期與湖郡聲勢聯絡蕪湖太平爲金陵西面要隘並著該大臣飭令水陸各軍會合進攻先將蕪湖收復再行攻取太平爲進擣金陵之計西梁山要隘業經北岸官軍奪取其東梁山一處亦爲南岸緊要隘口並著派兵乘勢克復庶水師可以沿江東下由蕪太江面直抵金陵楊載福見已銷假尙未到營並著曾國藩迅催該提督駛赴安慶聽候調度首逆陳玉城分布黨與與北路苗捻各股聲息相通見由豫省洛陽折竄陝省商雒等處賊匪卽係陳逆分黨而張落刑又由潁上竄至雉河集爲糾捻回竄之謀儻任陳逆竄出與張落刑苗沛霖等句合其患何可勝言著卽飭多隆阿等軍嚴密堵禦迅克廬城殲擒逆母令伺隙免脫李續宜欲由六安助攻廬州如廬郡可望得手卽著分兵助攻廬郡一面親

赴潁上均著相機妥辦袁甲三前派張得勝等軍進攻廬郡東北兵力本不甚厚該逆此次援絕勢孤南路無可覬覦勢必由北路竄逸著袁甲三嚴飭張得勝等加意防範並著添派兵勇會合楚軍迅圖攻克城池九洑洲與浦六相近前據袁甲三奏李世忠擬卽進攻未知見在曾否得手著袁甲三迅催速克卽可與曾國藩得勝之師聲勢聯絡巢縣所屬之東關路通巢湖爲廬巢緊要關隘見在是否仍爲賊踞並著曾國藩派兵攻取以斷廬逆聲援將此由六百里各諭令知之○諭中外諸軍合力規取嘉定江南軍務頗有起色李鴻章統帶勁旅已有四千餘人到滬聲勢不爲不壯著卽與薛煥籌商調度並飭李恆嵩等克復青浦太倉兩城此兩城克復後自應分路進攻先其所急務將附近上海各城以次收復再爲規復蘇常之計該署撫等務當計出萬全謀定後動以

副委任曾國藩軍勢甚盛若蕪湖太平一克即可直擣金陵該逆見楚軍勢壯難保不下竄鎮江與蘇浙之賊連成一片李鴻章到滬布置後著派委得力將弁留兵守滬仍自率精銳前赴鎮江整飭水師以期南北各軍聲勢聯絡如上游楚師可達金陵亦即統率水陸各軍實力助剿毋任逆匪下竄其上海防剿事宜如李鴻章已赴鎮江遇有與外國兵丁會攻之處薛煥仍當力籌兼顧毋得稍涉推諉將此由六百里各諭令知之○允僧格林沁辦理山東畝捐○廣湖北鄉試中額四名甘肅皋蘭縣學額一名○已巳山西巡撫英桂奏另股粵匪由南陽內鄉竄擾陝境圍攻商州雒南所至焚掠該處距潼關朝邑不遠與晉省僅隔一河蒲州府屬之永濟虞鄉榮河解州屬之芮城等縣最爲喫重絳州屬之河津平陽府屬之吉州隰州屬之永和太甯汾州府屬之甯鄉石樓臨

縣永甯等州縣亦濱臨黃河與陝西接壤均關緊要見在粵匪已入陝界所有晉陝毗連之處在在須防已飛咨護太原鎮臣和昌酌帶官兵赴蒲解等處會同地方文武妥籌防堵並將續調大同官兵二千名以一千名先赴蒲解交和昌等扼要分布以一千名暫駐平陽察看賊蹤所向就近調遣仍畱河東道劉子城駐紮茅津渡會同帶兵將領將在防兵勇逐日勤加操演俾成勁旅以壯聲威 上諭議政王軍機大臣等潼關與晉省僅隔一河蒲州平陽兩府及絳吉隰三州所屬沿河地方防務均關緊要英桂見已派兵扼要分布並調護總兵和昌由茅津渡改赴蒲解等處著卽飭令實力防堵毋稍疏忽至盧氏嵩縣匪股亦難保不回竄洛陽窺伺秦晉英桂仍宜督飭道員劉子城嚴防茅津渡一帶要隘勿稍大意並著瑛棨張芾督飭兵團將潼關防務加意布置藩籬關

一帶亦仍飭令在防文武會同晉省防兵隨時防範其竄擾孝義
應股匪卽著孔廣順督率兵勇並瑛棨所派防堵各軍嚴密堵剿
如該提督兵力尙單卽著托明阿瑛棨添調滿漢官兵前往接應
見據駱秉章奏稱川北敗匪竄至陝境甯羌州僅止八九百人何
以陝省防兵遽行敗退致令越過陽平關殊堪痛恨該匪此時已
由小徑繞過甯羌州竄至大安驛駱秉章見飭營官蕭積恭管帶
楚勇五百名越境窮追著瑛棨卽飭漢中帶兵文武會合川兵前
後夾擊並添兵會剿以期及早殲除毋得再事因循將此由六百
里各諭令知之○諭駱秉章奏准徐之銘咨稱林自清請管帶兵
練攻剿四川賊匪進攻江南以圖報效等語川省見在青神已復
生擒賊首涪州亦已解圍不日卽就蕩平毋須鄰封協剿滇南大
理府城迄今未復餘匪蔓延林自清白應先其所急迅埽本省逆

氛以資捍衛著徐之銘仍飭林自清統率所部馳赴大理攻復郡城殄除羣醜如業已起程並飭趕緊折回滇省該總兵奮勇可嘉自能將大理一帶匪徒悉數剿平榮膺懋賞也將此由六百里加緊諭令知之○諭總兵林自清擁眾趨蜀名爲自備資斧實欲就食鄰疆已嚴諭徐之銘將該總兵所帶兵練迅卽撤回仍行攻剿大理逆匪惟林自清跋扈性成徐之銘前摺已稱未能鈐束恐未必遂肯折回如其直抵川境不聽禁約卽與叛徒無異著駱秉章密派兵勇相機辦理儻敢恃眾抗拒卽行擒捕不必稍存瞻顧並著知照韓超密爲防堵毋任由黔入川至剿辦一切機宜毋庸告知韓超恐黔滇路近或致洩漏潘鐸張亮基計應行抵川境著駱秉章咨催前進張亮基久任滇督林自清是其舊部當可設法收撫妥爲駕馭著卽與潘鐸會商妥辦如林自清願赴大理剿賊尙

可量加任用設竟桀驁不馴務當設法殲除以弭後患其部下人數雖眾未必盡甘背叛不妨開陳利害散其黨與俾爲我用是在該署督等審度機宜不爲遙制其辦理情形仍著隨時奏聞以慰廑念將此由六百里加緊各諭令知之○庚午諭內閣考試爲掄才大典閱卷大臣均出自特簡理宜悉心校閱慎重去取方足以昭平允況殿廷考試人數無多派出之閱卷大臣每人所閱多者不過一二十卷盡日之長何難詳細校閱本月十五日考試試差人員經大學士賈禎等分別去取呈覽復命議政王軍機大臣詳加覆閱乃張之萬擬取之霍穆歡詩內槩字誤寫作槩沈秉成詩句聲喚一輪孤全句費解既經簽出仍復擬取尤非因尋常小有疵累簽出者可比吳存義擬取之張丙炎詩句內欸字誤寫作款王發桂擬取之馬元瑞全詩低三格寫實屬違式其餘擬取卷內

添註改補以及筆畫小有錯誤未經簽出者甚多因其無關弊竇免其撤去外試思考差各員係豫爲典試衡文之選若令詩句失黏文理費解之員濫膺是選豈能識拔真才該閱卷大臣等如謂有心舞弊尙可料其不敢但卽以此一事而論其不以公事爲重任意草率亦可類推見當兩宮 皇太后親裁庶政該大臣等事任勞任怨尙恐不足報答 皇考文宗顯皇帝簡用之恩豈可掉以輕心稍存玩忽此次姑免深究嗣後各部院大臣辦理一切公務須振刷精神實事求是方爲不負委任儻再有此等情事則是有心欺罔必當從嚴懲處決不寬貸以肅紀綱而昭鄭重將此通諭知之○都興阿奏逆匪退至龍虎集迪南一股由舊港至土橋雙橋五聖橋一帶又一股由樸樹灣梁家灣等處踞險連營直接江岸欲待援賊續渡並乘暇時出竄擾本月初五日總兵詹啟

綸派守備程義友帶隊數百潛赴徐家集一帶扼駐險要牽制賊勢都司李金鼇率領礮隊由高明寺渡河馳赴樸樹灣迎擊遊擊李福興等帶隊策應該逆出壘抗拒我軍三路齊進槍礮環施正盛戰閒逆匪後隊又由河北竄渡接應經李金鼇指揮礮隊奮力迎擊執旗悍賊紛紛倒地逆勢怯退我軍乘勢截殺逆隊亂搶渡河溺斃甚多我軍追殺百餘名毀其浮橋奪船二隻時已向晚收隊回營初六日新城舊港徐家集新集四處賊匪出巢竄擾又經詹啟綸派參將鄭啟賢都司李金鼇等出其不意繞路橫擊都司周大有等帶隊策應戰逾多時參將鄭啟貴突前衝擊將執旗悍賊殺斃四名該左隊散亂我軍乘勢呐喊刀矛交錯復斃悍賊數十名該逆分路回巢統計兩次獲勝斃賊過千溺斃者不計其數其滋擾土橋江岸一帶之賊經黃彬吳全美飭派守備張天富等

撥船上駛迎擊轟斃不少該逆不敢近傍江岸初九日據探賊匪復有北竄揚城之信臣料該匪敗殘之餘未必遽敢回撲其聲言北竄必係虛張聲勢暗爲退遁之謀當派副都統杜嘎爾等率領馬隊連夜進剿該逆果於是夜西遁我軍馳追三十餘里及於新城十二里汊該逆分道西奔我軍馬隊亦分兩路衝殺逆匪後隊猝不及防斃賊數百餘名投水溺斃者無算該逆前隊聞信回援我軍縱馬直衝槍箭齊施適詹啟綸派副將孫文友等督帶馬勇趕到合兵鈔殺該逆披靡奔竄我軍又追殺二十餘里始行撤隊是日殺賊約共二千餘名生擒長髮老賊二十六名訊明正法救出難民無數此次逆匪二十萬眾麇集揚州城下百計攻撲冀圖狡逞我軍旬日之間將此大股逆匪擊退保全完善之區人心鎮定居民安業如常是皆仰賴聖主隨事指示機宜訓諭周詳之

所致見聞逆匪退至儀徵以西分路打館俟確探情形相機勦辦以期殲除淨盡 上諭都興阿奏官軍勦賊疊勝擊退大股逆匪揚境附近肅清一摺都興阿堵剿有方殊堪嘉尚著卽督飭各軍將儀徵一帶匪眾悉數掃除以杜窺伺○諭鄭元善奏官軍克復永甯縣城一摺擒匪大股竄陷永甯縣城經鄭元善督令副將楊飛熊帶隊進兵直抵城外奮勇衝殺守備趙鴻先首先登城官軍遂由東門殺入城內之賊殲殪無算當將永甯縣城克復其圍攻嵩縣之賊屯踞白楊樹地方楊飛熊復以馬隊衝擊共計斃賊三千餘名救出難民千餘人勦辦尙爲得手仍著鄭元善督飭各軍節節掃蕩毋令西竄另片奏兵練勦毀賊巢等語商固土匪汪朝友經赴援潁郡之候補知府袁懷忠等生擒汪逆之妻李氏及其叔汪嘉運並賊王有得多名商固一律肅清攻剿甚屬奮勉仍著

該撫飭令官軍將汪逆擒拏正法以絕根株○李續宜奏臣於三月二十五日行抵六安接印任事伏念潁州爲淮北要區城中兵勇未可深恃而城外四鄉多係苗捻各匪築圩盤踞一切剏撫防守機宜最關緊要查有布政使銜甘肅安肅道蔣凝學曉暢戎機辦事勤幹自去冬駐紮六安士民愛戴臣前擬以該員移紮潁郡聯絡官民布置城守當能悉臻妥協不料潁郡解圍後勝保賈臻卽會札道員黃元吉統帶該城官軍且任苗黨出入臣若復派蔣凝學前去必致與勝保決裂而傷和衷兵濟之道若任苗黨往來置之不論不議恐潁州要害又將爲苗逆竊踞是以固始城池臣已派營防守並調成大吉蕭慶衍兩軍挾赴三河尖會合駐紮而潁州一城臣徒日夜焦思仍未敢撥營駐守 上諭議政王軍機大臣等李續宜奏籌畫近日軍情一摺覽其所奏殊未達朝廷委

任之意地方公事係巡撫專責李續宜既知黃元吉不能得力何以並不撤回泥和衷其濟之小節坐視貽誤地方甚失大臣力任艱鉅之道苗沛霖鬼蜮伎倆履行訓飭勝保令伊密加防備見在仍任苗黨出入潁城是徒有解圍之名仍恐有占踞之患急宜派委得力大員前往整頓以防亂萌著李續宜卽飭蔣凝學移軍前往並將黃元吉撤回無稍瞻顧勝保辦理苗練事宜意多遷就見該撫行抵六安曾國藩軍威大振廬郡望窮援絕計日必克著卽馳赴潁郡辦理苗練一切事宜該撫量力之能否酌事之是非認真辦理斷不可稍有趨避之心致負委任前密諭曾國藩各情諒已恭錄寄知該撫自可無支絀之患至於毀譽之言朝廷自能鑒察不至掣肘不必因此轉生推諉其三河尖要區嚴飭成大吉等妥爲防守儻該撫畏勝保之驕恣意存疑沮以致貽誤則責有攸

歸轉不能稍爲寬恕也將此由六百里密諭知之○勝保奏臣自
回穎郡後苗沛霖益思感奮晝夜圍攻潁上賊眾勢孤援絕於四
月初二三等日忽出悍賊三千餘人僞稱投降副都統薩薩布等
察知賊情叵測姑准其降設伏以待該逆一出城關卽撲營濠意
圖鋌竄經苗練等四路邀擊悉數殲除而城賊益加死拒初六日
我軍四面攻擊該逆糧藥俱盡勢不能支當將城門攻開一擁而
入城中悍賊約近萬餘悉數殄盡立將潁上縣城克復臣卽飭帶
兵各官督同苗沛霖剋日由潁上移營江口集進擣蒙亳老巢以
收破竹之效至邢圩擒首邢冠軍從前助虐攻陷穗子鋪截我大
兵糧道情罪難寬當飭黃得魁廖慶謀等四面紮營晝夜圍攻臣
由潁上馳赴穗子鋪嚴飭各軍迅速進剿邢冠軍率賊數千出圩
拒戰勢甚猖獗我軍併力齊進斃匪數百名將邢冠軍生擒並擒

獲長髮老捻邢金蘭等多名追至濠邊匪首王浩然等仍踞圩死
守堅匿不出臣當飭各軍合力環攻無難指日殄滅惟據探稱張
落刑遁回雉河復糾合五旗蒙亳老捻聲言仍欲南援潁上西救
邢圩幸潁上業經克復該逆無所施其伎倆而邢圩正在得手更
當嚴防援賊已飭前敵各營認真擊剿妥爲堵禦臣暫駐太和居
中策應俟邢圩攻克後再當酌度皖豫緩急督軍進剿又奏已革
道員苗沛霖自奉諭旨革職問罪後悔悟自新亟思報效臣奉命
督辦皖豫軍務以賊數眾多非專恃官兵所能殄滅飭令苗沛霖
帶罪立功苗沛霖遂毅然以殺賊自任潁郡未經解圍以前該革
員自備資斧調練圍攻潁上張逆老巢爲圍魏救趙之計迨潁郡
解圍後逆匪齊赴潁上救援均經苗沛霖擊敗屢獲勝仗未及一
月卽將潁上縣城攻克生擒著名捻首多名城內老賊萬餘悉數

殲除臣仍飭卽日進兵江口集直擣蒙亳老巢務擒首逆以靖擒氛查苗沛霖本有將才惟性情不免執拗雖一時放恣自蹈愆尤而卒能悔罪立功克城殺賊較之始終怙惡及窮蹙求降者情罪迥異當國家用人之際似應寬其既往予以自新可否仰懇天恩將已革布政使銜川北道苗沛霖免其治罪責令實力圖功以觀後效如果始終奮勉再當奏請恩施在該革員仰沐鴻慈益當感激圖報卽臣亦可操縱得宜藉收指臂之助上諭苗練攻剿潁上疊經諭令勝保督飭苗沛霖務將張落刑殲除以明心迹詎苗沛霖意存觀望縱令張逆逸出竟欲以收復潁上空城爲乞恩地步卽勝保此次所奏攻擊情形亦明係苗沛霖縱令首逆遁逃僅以空城委我苗沛霖反覆無常各路統兵大臣及在京大小臣工莫不以爲斷不可恃然果真心反正何難寬其既往予以自

新乃不思感愧立功仍令張落刑他竄其居心狡獪該大臣諒亦深知若因收復空城竟免治罪明明墮其術中恐輿論必不能服據稱張落刑遁回雉河裝旗仍欲南援潁上西救邢圩而潁上已克苗沛霖若果能親率眾練剪除巨憝呈驗首級則心迹可明爾時該大臣嘉其出力代爲奏請免罪庶於事理較順而謗議亦不至朋興非朝廷故靳恩施因宥罪賞功乃天下萬世公是公非之所在豈能不予以持平李續宜尙在六安潁郡兵力暫歸勝保調遣其山陝撥解協餉著一併歸該大臣糧臺收納以便支發又另片奏餉需支絀不得不就地抽釐以補正款之不足等語所有周口三河尖兩處釐稅著卽會同李續宜鄭元善遴選廉潔誠實之員妥爲經理仍將徵收數目按兩月一次報部覈銷作爲軍需正款以杜弊端將此由六百里諭令知之○諭瑛棨等奏鎮安孝義

相繼失守請添調晉豫兵勇會剿鄭元善奏賊匪游駛汝登各境
勢將回竄各一摺見在該匪盤踞孝義一帶後股復由商州棣花
竄向山陽縣另股仍在商州之白陽店肆擾山內溝岔繁多逆眾
狡詐百出難保不窺伺平原孔廣順移兵藍田縣分別防剿著該
提督嚴飭將弁堵剿兼施毋令紛竄孝義距省垣不遠根本重地
尤應先事豫防著瑛棨會同托明阿將城中防守事宜嚴密布置
張芾亦卽激勵附近省城各縣團練協同官兵嚴防各隘口毋稍
鬆懈陝省馬步官兵節經調赴他省該省營伍空虛著鄭元善將
調赴防河馬隊五百名迅卽飭令馳回關陝以厚兵力楊飛熊一
軍見在追剿汝伊一帶之賊著卽飭令督帶全部星速入陝截剿
潁郡業已解圍所有道出商城赴援之袁懷忠等所部兵勇著鄭
元善飛咨皖省畱於豫省西界堵擊回竄之匪楊飛熊入陝後卽

可以此軍作替余際昌之傷已平復否如能幫同袁懷忠帶隊殺賊可資得力豫匪分道入陝鄭元善不能堵截貽患鄰封實屬非是見已親赴邠縣勦辦汝登竄匪著飭巴揚阿等認真勦洗一面派兵協助陝省勦賊方爲正理豈可以驅賊出境爲了事前因商確告警諭令官文調派鄖陽鎮官兵赴援著官文等迅飭該鎮越境迎勦毋許稍事推諉其竄入南鄭縣新集之賊經該縣知縣周蔭壽等督勇進勦焚燒賊巢該匪驚潰向東南竄出陽平關一帶均已肅清惟甯羌州等處逼近川北川省勦辦得手則陝境更覺喫重著駱秉章卽飭蕭積恭督帶楚勇併力窮追並催毛震壽剋日帶兵起程速赴新任陝省軍情緊急該督素顧大局諒能隨時策應毋俟諄諄告誡也永甯雖經收復該匪飄忽無常仍著英桂嚴飭在防文武員弁認真防守毋得以賊蹤漸遠稍涉大意將此

由六百里各諭令知之○予陝西陣亡參將承保祭葬世職○辛未 上詣 大高殿祈雨○諭議政王軍機大臣等陝省兵力本不足恃歷年調赴河南等處軍營本省防兵更形空虛此次逆匪竄入陝境剽悍異常見在竄至大峪口等處已近咸甯縣界無險可扼情形喫緊甚屬可慮而另股分圍雒南等處計甚狡詐非撿逆之志在擄掠者比設省城稍有疏虞則建瓴之勢豫晉楚北均受其害官文等諒已飭令鄖陽防兵前往助剿著卽催令由襄樊荆紫關一帶無分晝夜星馳入陝繞前迎擊不准稍形遲緩其餘襄樊等處如有防兵可以抽調卽派遣員金國琛統帶一併前進以期移緩就急保全完善楊飛熊一軍距陝尙近著鄭元善卽飭赴陝力圖堵剿該撫務當顧全大局不得以驅賊出境遂爲了事勝保所統兵勇尙有萬餘見在潁上已克事機較順著卽抽調精

兵二三千名派委得力將弁管帶赴陝務飭嚴爲鈴束迅速行抵
西安不可以降眾充數徒滋煩擾該大臣見在進攻邢圩儻因分
兵赴陝不暇兼顧皖疆卽將黃元吉所帶兵勇調赴穗子舖等處
防剿一面咨會李續宜派兵扼守潁郡俟陝兵調回再行辦理皖
省軍務該大臣定知緩急機宜斷不肯稍形推諉也馬德昭已經
由陝赴任此時諒可抵甘陝省爲沈兆霖兼轄之地該署督向來
辦事不分畛域如馬德昭業已到任卽飭挑選精兵二三千名赴
陝會剿所有各路援兵到後均由孔廣順督率攻剿藍田爲西安
門戶卽著妥爲督剿毋任竄人瑛榮等會同托明阿嚴守省垣申
明賞罰激勵人心以期眾志成城不得專待援兵藉詞推諉張芾
亦當招集團練協同固守毋稍疏懈山西雖稍遠賊氛但由潼關
他竄則晉省首當其衝所有茅津渡等處仍著加意嚴防其黃河

船隻著英桂卽飭悉數撤回北岸並派安幹之員周密巡查不可稍形鬆懈將此由六百里加緊各諭令知之○王申袁甲三奏據道員馬新貽拏獲奸細接出僞英王陳玉城給琳天燕余安定一信註明遞至壽州字樣蓋有僞印察覈信內措詞粵苗聲息仍屬相通臣已嚴飭各要隘認真盤查期於有犯必獲以絕其往來之路見在楚師已進紮廬郡東北兩門臣又添撥馬步各隊與楚師聯爲一氣俟各路營盤紮定卽行會合進攻又據博崇武等稟稱四月初二日願上踞逆獻出婦女一千餘名馬五六百匹並獲僞沃王張逆僞印一顆僞龍袍數件除誘殺追殺外餘賊一千餘名均經苗練收撫願上縣城卽於初六日收復所有婦女馬匹均爲苗練所有勝保以苗練剿擒而又任苗練撫捻恐植黨愈多以後更難辦理上諭議政王璽機大臣等有人奏願上收復婦女馬

匹均爲苗練所有並據民練盤獲逆首陳玉城給僞琳天燕余安
定一信鈔錄呈覽其中詞語粵逆信息仍屬相通不出昨諭所料
勝保尙爲苗練歷陳戰功代陳忠悃豈竟爲所迷惑而不知耶
上餘賊均經苗練收撫是旣以苗勦捻而又任苗撫捻勢必植黨
愈多爲害愈橫以後辦理更爲棘手此事疊經寄諭至再至三反
復詳盡該大臣等惟當竭其智勇以求妥實辦理之法若止如此
苟且抵塞將就了事何以杜天下人之口且何以服天下人之心
僞信一件著鈔給閱看廬州賊勢方蹙楚師當已進紮袁甲三務
卽添撥馬步各隊與楚師聯絡進攻早圖克復李續宜身膺疆寄
責無旁貸廬城之西路通壽州旣據民練盤獲僞信恐其尙有句
結著會同袁甲三籌商布置嚴絕賊援並著該撫迅赴潁州一帶
妥籌善後章程勿稍遲緩將此由六百里各諭令知之○諭逆匪

前次竄撲揚郡都興阿以賊眾兵單未肯輕出自屬老謀深算昨據該將軍奏擊退攻撲揚城賊匪均竄至儀徵以西打館附近郡城已無賊蹤本日袁甲三所稱揚境之賊回撲六合經李世忠擊退後又併力撲犯揚州此股賊匪未知是否卽係都興阿所稱擊退之股惟都興阿與李世忠若能合力夾擊便可肅清著卽會合李世忠一軍追躡盡力殲除無任回竄李世忠情形崛強其部下人眾未能悉遵軍律都興阿不令赴揚郡一帶恐其騷擾具有深意惟見當用人之際李世忠旣知忠勇奮發力解江浦浦口之圍追擊天六等處賊匪於揚防亦頗有裨益自後李世忠或撥兵助剿或與之夾擊賊匪該將軍惟當處以平易與之聯絡期於和衷共濟不必稍存成見謂李世忠非可與共事之人致生缺望也見在儀揚之賊退向何處袁甲三卽飭李世忠跟蹤追剿並派兵攻

復九洑洲等處以期節節進逼與上游楚師聯絡聲勢至李世忠月餉已諭令袁甲三於各處協餉到時將該提督所墊之欸先行提撥歸還吳棠所撥三千兩按月速解均著迅速撥解毋任有所藉口將此由六百里各諭令知之○癸酉諭內閣朕奉

慈安皇

太后 慈禧皇太后懿旨本年庶吉士散館經派出閱卷大臣尙

書朱鳳標等將各試卷公同閱看擬定等第名次開單進呈於各卷考列前後尙屬公允惟萬青藜所閱擬取一名嚴辰一卷詩賦文理尙屬明順而其賦體全篇牽引本朝故實作意鋪張詞意多未著題甚至過事頌揚有女中堯舜等句國家取士本明試以言之義總宜崇實黜華用覘品學翰林散館將以選授清華之職試用詩賦尤應切當敷陳若如嚴辰所作不求實際專事揄揚於人品學術頗有關繫此風斷不可長嚴辰著改爲一等末名卽

將原擬一等二名之王珊作爲一名其餘以次遞推嗣後各項考試派出考官及閱卷大臣等務當悉心講求切實毋事虛浮以期拔取真才用副敦崇實學之至意○嚴諭勞崇光英桂迅解京餉○乙亥諭內閣雲南學政張錫嶸奏請宗祀 文宗顯皇帝以備典禮一摺並附陳宗祀辨擬條說著王大臣大學士六部九卿翰詹科道敬謹會同妥議具奏○諭徐之銘奏四品掌教馬德新率回眾就撫懇請賞給頭品頂帶花翎等語馬德新率眾就撫自應量加獎勵著賞給二品頂帶並賞戴花翎責令約束回眾如不能約束或致別生事端惟該掌教是問儻馬德新嗣後於綏靖回眾諸事或不能得力惟徐之銘是問○諭議政王軍機大臣等林自清跋扈情形本非徐之銘所能鈐束張亮基前已行抵宜昌潘鐸擬俟張亮基到川後會同赴滇著卽與駱秉章會商妥辦將

林自清入川一事布置就緒迅卽馳赴滇省毋稍濡滯前徐之銘以武生馬如龍奏請署理總兵本日又以四品伯克掌教馬德新奏保頭品頂帶花翎馬如龍已准所請馬德新亦酌改二品頂帶花翎等獎勵允其所請此等事於體制全然不合緣恐回眾心疑已久竟爾駁斥則反側益堅於潘鐸張亮基入滇情形殊有關礙故暫時權宜允許以示不疑潘鐸張亮基行抵該省將徐之銘撤任後其所用文武及所保官階一切均須次第整頓亦不必操之太切至林自清擅自帶兵分起由黔入川形同叛逆究竟是何居心駱秉章等相距較近必能探詢其詳著駱秉章潘鐸張亮基韓超田興恕會同籌商如該練眾不遵開導察看情形必須用兵剿擊卽著相機辦理此閒不爲遙制何有保見在何處徐之銘近來連次奏報均未提及並著駱秉章等探明具奏徐之銘本日摺報

內請飭催福陞迅赴雲南提督之任所有提督印信是否仍畱省
署抑係林自清帶出並著駱秉章等一併探明具奏將此由六百
里各密諭知之○諭薛煥奏查明克復嘉定詳細情形並派兵進
攻太倉及華爾未留薙髮會防局官紳不遵曉諭各摺片覽奏均
悉克復嘉定縣城前已降旨令薛煥等查明獎敘矣進攻青浦既
借英法弁兵之力則規復太倉必須專派官軍前往不至事事借
力於人爲所輕視李鴻章所部各軍業已到滬兩旬足資休息如
已訓練精齊卽著派令出隊一鼓作氣克復太倉所謂先聲奪人
行軍要務必須妥籌機宜以期必勝華爾於賞加副將後仍未薙
髮易服其不受鈴束已可概見著薛煥李鴻章酌量辦理至會防
局官紳專恃洋人爲政不顧後患朝廷早知其流弊薛煥等務當
咨商曾國藩悉心防範毋任把持局中官紳係屬何人所派聞自

上年十二月至今所費甚鉅作何支銷何人給且聞該官紳等在局聚賭筵宴並不以公事爲重如果屬實無怪爲外國藉口卽著薛煥李鴻章逐款查明嚴爲裁汰不准任其妄作妄爲以肅官方知府吳雲本係失守之員上年十二月間曾諭曾國藩查明定罪何以派令在局當差卽著薛煥李鴻章就近查明擬罪候旨辦理此外如金鴻保閔釗俞斌均吳煦私人藉端肥己把持捐務李鴻章甫經到任若不破除情面秉公甄劾則滬上頽風何由振作著會同薛煥嚴行查明具奏儻薛煥有心回護並著李鴻章單銜參奏滬上稅務釐捐所入甚爲充裕均爲劣員侵吞入己是旣虐取於民仍於軍餉無補此等貪劣之員豈可稍存姑息著李鴻章嚴密查辦以儆盜臣並著該撫派委廉潔之員妥爲經理如上海無可派之員卽咨曾國藩派委員赴滬差委力除積習以清弊端

逃弁況文榜羅大春吳再升貴廷芳陳步高等恒怯無能疊諭曾國藩左宗棠傳旨拏問聞貴廷芳搶掠婦女行同盜賊若任令久稽國典軍令何以嚴肅著薛煥李鴻章咨商曾國藩就近審明分別嚴定罪名不可再涉遲緩藩司林福祥情尤可惡並著審擬具奏儻任令遠颺或致自盡惟薛煥李鴻章是問懍之慎之將此由六百里各諭令知之○丙子都興阿奏逆匪退至儀徵仍分踞各路時出擄掠經總兵詹啟綸疊派副將孫文友等出奇截剿連獲勝仗其竄擾沙漫洲等處另股數千經黃彬吳全美分飭副將黃廷陞遊擊梁卓高等督帶師船轟斃甚多旋據各路探報本月十三十四等日賊已乘夜西遁有由紅山窰渡河分路回竄之信又欲分股竄往六合當派副都統杜嘎爾督帶馬隊急馳追剿十五日追至儀徵探得逆匪南股已近浦口北股已逾六合迤西遠竄

杜嘎爾等因天晚撤隊回營見在揚境一律肅清此次各營將士力戰解圍異常奮勇謹將尤爲出力各員弁先行開列懇恩獎勵其餘在事員弁兵勇容分別查覈彙案保獎 上諭內閣此次官軍續獲勝仗揚境肅清剿辦尙屬得手在事出力之總兵黃彬吳全美詹啟綸著各賞給白玉翎管一支白玉搬指一箇大荷包一對小荷包二箇並交部從優議敘副都統杜嘎爾著賞給頭品頂戴○諭議政王軍機大臣等瑛棨等前奏逆匪竄逼省城次股逆匪在商州白楊店焚掠勢甚危緊數日以來未見續行奏報廩念寶深孔廣順移紮藍田進剿能否堵扼省垣守備若何著卽迅速馳奏陝省軍情緊急官文等向來辦事能顧大局著卽飛飭鄖陽防兵及何紹彩之軍星夜赴援並著鄭元善速飭楊飛熊之軍越境會剿其徐榮柱之兵著一併飛催前進期與陝省之兵前後堵

擊痛殄逆氛並著瑛榮等分別迎催相機調度京兵未到之先蒲州同州一帶空虛亟宜堵禦湖北河南所派之兵應一面追剿一面繞出賊前截擊山陝猶稱完善且爲京師屏藩尤應極力保固陝省與晉省一河之隔蒲同一帶最關緊要必須及早嚴防英桂著卽出省相機布置毋得毫無備豫以致臨事周章該省紳士如徐繼畬田雨公趙德轍均負鄉望素能辦事英桂當卽會同熟商布置籌畫萬全陝省兵力雖不甚厚而鄂豫兩省之兵赴援最爲切近如楊飛熊何紹彩等軍均素稱得力若能迅速趕到與孔廣順併力剿擊瑛榮等督飭地方戰守兼籌自可不至任賊猖獗昨據潘鐸馳奏見到川省與駱秉章商辦各事已諭令卽由川赴滇陝省軍情托明阿瑛榮孔廣順等更無旁貸務卽力籌妥辦詳悉馳聞將此由六百里各諭令知之○諭慶端奏循處兩路官軍連

日攻剿均獲全勝江山一律肅清一摺著慶端卽飭帶兵各員乘勝進攻節節掃蕩將台處等失守郡縣次第規復無稍延玩左宗棠連日追剿應已將竄匪悉數殲除旬日以來未據續報情形實深廑念該撫接奉此旨卽將近日閩浙軍情詳細奏聞正在寄論閒復據慶端奏臺灣彰化縣轄境會匪滋事臺灣道孔昭慈督兵剿捕勇丁內變官兵被害彰化縣城失守該道尙無下落已派曾玉明等督勇往剿請卽漢黃德道洪毓琛暫行在臺會辦等語臺灣孤懸海外人心浮動辦理稍失機宜必致全臺震動曾玉明旣爲臺人所信服著卽飛飭該總兵統帶兵勇剋日馳赴彰化剿辦並飭總兵林向榮實力進剿該匪有分竄嘉義鹿港之謠務須嚴飭所屬妥爲防範毋任闖入紳士林鳳成所募之勇因何內變其起釁根由並孔昭慈實在下落及副將夏汝賢等殉難情形一併

查明具奏升任湖北漢黃德道洪毓琛尚未起程准其暫留臺灣會同曾玉明等籌辦防剿俟情形稍鬆再赴新任張啟煊接統曾玉明所部臺勇能否得力溫州一帶軍情緊要著嚴飭該革道認真攻剿毋許粉飾遷延徐宗幹久任臺灣情形最爲熟悉著在省就近調度總期迅速肅事勿任蔓延耆齡奉命援浙著卽督帶粵兵剋日赴閩與慶端左宗棠籌商會辦以厚兵力而牽賊勢毋得稍事逗留雇募潮勇一節仍遵前旨慎重選擇毋貽後患將此由六百里各諭令知之○命直隸提督成明馳赴陝西協剿○撥密雲駐防兵七百名赴陝西剿賊○丁丑恭上 母后皇太后徽號曰 慈安皇太后 聖母皇太后徽號曰 慈禧皇太后 上詣慈甯門行禮○賞恭請 冊 寶龍亭校尉銀○諭議政王軍機大臣等鄭元善奏河洛捻股經馬步官軍擊剿大勝賊匪全股

向東南奔竄河洛已無賊蹤見在楊飛熊一軍勦辦豫賊喫緊未能赴陝已另撥兵勇千名遴委得力將弁會合陝兵扼勦粵匪並與晉省防兵互爲聲援等語豫省軍情正當喫緊楊飛熊一軍既不能入陝惟當責成該員遇有後起竄陝之匪實力勦截毋令再與前匪句合貽禍陝疆見由商境進撲雒南之賊已偪閩鄉該撫抽撥兵勇千名赴太峪口駐紮該處爲豫秦晉三省要隘自應力扼賊趨著卽星速調派以杜分竄至業已入陝之匪恐因楚軍截勦緊嚴或折而西趨與川匪會合或由潼關上流徑行北趨擾及晉省其患均不可勝言前曾諭令袁懷忠等所部兵勇畱於豫省西界堵賊回竄見在楊飛熊既未能入陝卽可將此軍一併畱豫以便另選豫省得力之軍由蒲同一帶前往陝省迎頭截勦該撫務當顧全大局不可存以鄰爲壑之心致干罪戾所派前赴閩鄉

之兵係屬何人統帶能否得力未據聲明該省帶兵將領如巴揚阿圖塔納等均稱得力卽著會同毛昶熙酌量調派以資得力此外添調赴陝助剿之兵亦必妥派得力大員管帶前往總期迅速藏事不可苟且塞責遷延貽誤將此由六百里各諭令知之○撥京營練兵一千三百名赴陝西助剿○戊寅以恭上 慈安皇太后 慈禧皇太后徽號禮成頒詔天下覃恩有差○諭內閣前因駱秉章奏參前署湖南巡撫翟誥年力衰邁以致諸事廢弛當奉 文宗顯皇帝諭旨將該員撤任飭令來京另候簡用見在該員到京察其年力就衰難期振作翟誥著卽行休致○袁甲三奏總兵張得勝道員馬新貽等會合楚師於廬州城外紮營四面合圍陳逆於四月十四日二更後帶領悍賊分出東北兩門攻撲楚皖各營我軍一面守營一面挑選精銳出營力戰正酣戰間楚師已

於東門獲勝趕至北門斷其歸路賊遂大潰兩軍合力衝殺乘勢
搶過城濠該逆回城無路遂向西北奔竄經官軍轟斃殺斃自相
踐踏而死者屍積如山多隆阿督隊由東門進城張得勝由北門
進城將截回之賊搜殺淨盡廬州府城卽於十五日子刻克復多
隆阿與張得勝等復添派馬步跟追多隆阿又親督後隊繼之三
戰三捷斬擒萬計餘匪不過二三千名已飭追兵迅速前進毋使
餘燼復然見在李續宜已至六安臣飛咨卽飭府縣各官進城辦
理善後又奏正在封摺閒據探廬郡敗逆所賸不足二千人竄至
壽州城外環跪乞降壽州城門已閉未容入城臣查首逆陳玉城
平日暴戾恣睢與江南各逆積不相能惟賊首馬融和陳得才等
係該逆心腹前次竄赴西路會合捻苗亦係該逆主使屢次掣獲
僞信該逆總惓惓於西路與苗亦聲息時通今向西北竄突必非

無因而至臣於甫得廬郡克復之信卽經嚴飭總兵博崇武督練截剿並飭姚家灣練總姚紹珍趕調淮南團練由朱家集一帶扼要兜剿不容該逆渡淮北竄以冀殲除淨盡但苗沛霖心懷叵測是否不至收納尙未可知臣見又飭姚紹珍令其擒斬陳逆毋任免脫一面嚴札博崇武申明約束以該逆罪大惡極斷無准其投誠之理且壽州正陽係該署鎮轄境責無旁貸容一人一騎偷渡淮河或闖入壽州定惟該署鎮是問至李續宜見駐六安由六至壽一路早已節節布置多隆阿又督飭馬步跟追必能會商妥辦上諭議政王軍機大臣等廬郡克復詳細情形尙未據曾國藩等奏到據袁甲三奏狗逆率其悍賊衝圍而出固由官軍圍攻甚緊亦恐尙有與張落刑苗沛霖等先期勾約情事前據袁甲三密陳狗逆困守廬城東南兩路無可突犯惟張落刑及馬泳和等在

壽六交界保恐勾結會合又據奏該大臣兵練由廬郡西北紮至東北今狗逆驟由西北竄突該大臣之兵不能得力平日布置未能周密可想而知其爲張落刑苗沛霖之句合窩藏亦在意中袁甲三惟當急圖補救扼要兜擊毋令該逆渡淮北竄以期力贖前愆並著多隆阿李續宜密飭各路將弁偵探狗逆去向跟蹤追躡不使稍停喘息自可一鼓殲除博崇武係往來苗寨之人狗逆旣與苗練相通博崇武前往截剿殊不足恃袁甲三仍當於驅策之中嚴加防範至環跪壽州城外乞降之賊狗逆是否在內粵匪余安定是否尙在壽城不容敗匪入城者係屬何人袁甲三所奏未甚明晰著多隆阿李續宜就近查明會同曾國藩迅速具奏據袁甲三奏苗沛霖心懷叵測能否不收納狗逆尙未可知如狗逆徑投苗寨或苗練敢與官軍抗拒豈可不聲罪致討見在廬郡克復

兵力諒敷勦洗著官文曾國藩多隆阿李續宜密速籌商應由何
路進兵苗寨何策可以制其死命計議周妥卽一面馳奏一面進
兵朝廷決不稍爲掣肘官文等亦斷不必有顧忌濡忍之見如苗
練能擒斬張陳二逆以自贖卽當另籌辦法廬州善後事宜曾國
藩會同李續宜妥爲布置淮鹽稅課爲款甚鉅見在江路疏通淮
引諒可暢行著曾國藩督飭運司喬松年趕緊籌辦以裕國課而
充軍餉將此由六百里各諭令知之○諭寄諭欽差大臣勝保狗
逆陳玉城素稱兇悍狡獪多謀亟宜設法殲擒以除後患見在多
隆阿等督兵追躡該逆勢已窮蹙第恐乘虛西竄闌入豫境著勝
保嚴飭各路將弁併力截勦毋令免脫壽城附近苗練甚多苗沛
霖不能擒斬張落刑已屬疏縱此次陳逆餘黨奔竄到壽若再不
知愧奮激勵練眾將狗逆擒獻一誤再誤罪無可追並著該大臣

密飭苗沛霖嚴密布置會同官軍務將此股竄匪悉數殲除並將
陳玉城及張落刑擒獲或割取首級殄滅巨憝稍贖前愆將此由
六百里諭令知之○己卯諭內閣勝保奏據合營將士稟請該大
臣胞弟恩保隨營出力懇請該大臣奏獎以知府仍畱山西歸候
補班補用並賞戴花翎該大臣則以爲分內微勞未便擅擬獎敘
各等語國家賞功之典自有常經勝保因係親弟未便擅擬獎敘
自屬因賞及私親恐滋物議起見恩保著賞戴花翎毋庸以知府
畱山西歸候補班補用以示朝廷一秉大公並成全該大臣引嫌
之意嗣後若能常存此志以公忠爲念保不及私自足愜士心而
資表率○曾國藩奏自鮑超一軍連克青石太涇四縣後旌德與
甯郡賊勢中斷不能聯爲一氣福建臬司張運蘭恐踞旌之賊窮
極思竄遂率所部湘營商同署皖南鎮總兵唐義訓派撥三營以

勦爲防先發制之四月初一日行抵距城十里之跳生橋先飭陳玉恆帶中右營列旗兩岸復分隊作爲游兵以防賊鈔後路仍親督將士懸軍深入比及城闔賊不敢出張運蘭密遣前敵軍士故亂其伍以誘戰又從山後駐馬瞭望遙見城賊將欲伺隙出巢遂令各軍突起排礮仰轟躍濠直進該逆惶急繞城環走飛石下擊眾勇雖有傷亡而奮力爭先曾不少卻鼓聲礮聲猛若疾雷轟塌北門城牆丈許西門城垛十餘處張運桂冒煙突火躬率士卒蟻附而升賊搶垛口急以火器死拒我軍中槍而墮者四人受傷甚多張運蘭恐有挫失暫令收軍以俟詰朝進攻初二日忽報城中之賊悉數宵遁一由烏嶺走甯國縣一由梅嶺走甯郡張運蘭入城捕殺餘孽張運桂會合各營馳斬尾股斃賊不少解散脅從千餘人搜獲米糧數百石卽將縣城克復在事出力及陣亡員弁兵

勇容 查明分別奏請獎卹 上諭曾國藩奏徽州防軍克復旌

德縣城一摺所有出力及傷亡員弁著曾國藩查明分別奏請獎
卹○曾國藩彭玉麟奏據曾貞幹稟報繁昌旣拔之後諜知蕪湖
賊援潛在魯港增黨屯糧以圖抗拒遂商同總兵李成謀李濟清
等水陸並攻爲日後進取蕪湖之地三月二十七日曾貞幹等引
軍渡浮橋而進專攻北岸賊壘晏恭山引軍循魯港隄邊而進陶
保堂引軍循江邊大路而進合攻南岸賊壘李成謀督同各營官
在江面乘駕師船轟擊水路之賊彭楚漢復從港內率水勇飛槳
而出該逆腹背受敵撲水死者甚多賊船百餘號賊礮數百尊悉
爲我有兩岸陸師見賊勢已挫亟向石壘石卡盡力奮攻水師各
營登岸助戰賊卽潰退立將壘卡一律毀平遂復魯港餘匪悉向
蕪湖竄走魯港旣克之後卽可下達蕪湖而上蔽甯國者止有南

陵一縣則亦以速取爲宜二十九日曾貞幹調黃潤昌張陞等各率五成隊伍由石碓渡河而南仍親率所部並晏恭山陶保堂各營出繁昌山路整軍疾進密約四更時分各挾火具會抵南陵城下初我軍之將攻魯港也繁昌戍卒抽調一空曾貞幹以該處密邇南陵豫遣死士先往南陵附城一帶相度營基暗插標識復揚言大兵卽日壓境以懾賊心賊多自危不敢外竄至是曾貞幹帶同馬步諸軍乘夜猝至薄城而營萬炬齊然光燭數里賊蒼黃驚起曾貞幹揮令各營環城施礮猛擊逾時轟塌數丈眾軍從城缺攀躋而入縱橫擊刺所向披靡賊乃擁至東門望甯國一路而逃卽於三十日克復南陵縣城城中捕斬五百餘級搜獲米穀礮械甚夥臣查魯港爲蕪湖門戶南陵亦甯郡藩籬數口之間相繼攻克從此分道進兵規取甯蕪可無後顧之慮 上諭曾國藩彭玉

麟奏水陸各軍會克魯港要隘並攻克南陵縣城一摺仍著曾貞幹等飭令各軍奮力追剿並分兵迅克蕪湖等城毋令逆賊久踞○袁甲三奏據署壽春鎮中營遊擊朱佩棗稟稱狗逆陳玉城於四月十七日辰刻竄至壽州東津渡距城五里該遊擊會商苗練佯許進城見將狗逆及隨從僞王僞佐等七人全行細縛又據外委傅兆瑞同營稟稱該弁同進壽城苗練畱守壽州之李萬春已將陳玉城等七人誘令進城餘眾安置城外一面請示苗沛霖十九日得苗沛霖信卽將該逆等生擒次日派船械送潁州之江口集苗練營盤聲言解赴勝保軍營賊黨二千在東門外駐紮均令薙髮前赴下蔡分撥各隊調用臣查四眼狗本與苗練聲息相通此次苗練見其勢窮且追兵踵至未必非藉擒獻立功以掩其從前叛逆之罪該練之事係勝保一力主持所言解赴勝保軍營尙

屬可信陳逆惡貫滿盈勝保以大局爲重必能除此巨憝毋庸臣
之過慮但其黨二千餘人均屬獷悍之賊若任苗練收之用其死
力爲害不可勝言應請旨飭下勝保督令苗沛霖將已收逆黨全
數交出一併正法毋任一名漏網庶不至再有後患又奏琳天燕
余安定本係廬州人爲苗練勾結而來久住壽州與粵苗時通消
息見聞該逆因賊勢窮蹙已薙髮歸順苗練其人詭譎狡詐斷不
可使爲苗用又有信茂林者籍隸壽州亦係爲苗勾粵之人屢見
於僞信並聞其往來於廬郡販硝濟賊亦屬法無可貸見在淮南
漸就肅清此等莠民豈容倖逃法網相應請旨飭下勝保令苗沛
霖將二犯一併交出立正典刑又奏皖軍克復廬城時生擒賊首
僞王宗樞天義陳潮旺一係廣西起首老賊派員押解到營
臣委員訊問據陳潮旺供廣西北流縣人粵逆自金田鎮起事僅

一百八十人卽有該逆在內是年爲官軍擊敗該逆身負僞東王楊秀青逃跑楊秀青呼爲恩父陳玉城係其族姪是以呼爲王宗又云廬郡城內糧草足支三月惟油鹽甚缺專盼上年西竄之僞扶王陳得才僞天將馬融和等股回廬救應前幾日接到苗沛霖來信知潁郡解圍陳得才西竄已遠馬融和跟隨張落刑逃去均不能回救屬其早作打算狗逆盼援絕望又見楚皖官軍四面合圍恐蹈安慶故事是以背城一逞嗣因官軍兜殺無路可逃致被擒獲又云廬郡及和含浦六一帶均係出糧之區江南向藉江北之糧今全被官軍克復金陵萬不能久踞等語臣於訊明後卽將該逆凌遲處死梟首示眾以快人心上諭議政王軍機大臣等狗逆屢抗官軍從前李續賓等均被該逆戕害實屬罪大惡極既經苗練擒獲人心當爲大快而苗沛霖前罪亦可寬宥如將狗逆

解到後卽著勝保將其凌遲處死務卽傳首楚皖各營以洩眾憤而申天討其余安定信茂林二犯亦著勝保飭令苗沛霖卽行解赴該大臣軍營明正典刑儻苗沛霖意存觀望不肯將狗逆卽時獻出或縱令竄逸又如任聽張落刑回竄雉河集故智則是甘心叛逆罪無可辭卽著曾國藩多隆阿李續宜等督飭將領將苗練一併剿洗盡數殲除毋畱餘孽如苗沛霖業將狗逆釋放或勾結張落刑渡淮北竄著僧格林沁督兵迎剿或該逆西趨陳項抑或由南陽一帶奔竄商雒希圖會合髮逆卽著勝保鄭元善分飭將弁節節堵剿毋得稍有疏懈曾國藩奏南岸軍威甚振卽著飭令曾貞幹等迅克蕪湖太平直逼金陵鮑超一軍卽飭進攻甯廣分援湖州規復高淳東壩以期與江上之師聲勢聯絡併力進取又據袁甲三奏擒獲老賊陳潮旺供稱江北各城全被官軍克復金

陵糧道已斷萬難久踞該大臣志在滅賊一切機宜諒必妥籌熟計迅奏膚功毋俟諄諄訓諭也將此由六百里加緊各諭令知之○諭寄諭欽差大臣勝保苗沛霖此次擒獲陳逆以明其身非背叛自必將陳逆獻出朝廷卽因此施恩免其治罪則羣議亦可自息著勝保傳諭苗沛霖迅速交出毋許觀望至余安定信茂林二逆亦投入苗練夥中著飭令交出同狗逆一併明正典刑其餘逆黨二千餘名見經苗沛霖調赴下蔡等處備用試思該練旣非叛逆豈肯容畱逆黨著責令悉數交出盡法處治用明心迹該大臣前在天長等處曾爲陳逆挫敗此時自必樂於殲除第恐李續宜之兄李續賓在三河陣亡該撫切齒家仇尤甚於勝保見旣幫辦該大臣軍務卽係同辦一事該大臣於接收陳逆後卽將該逆正法傳首楚皖各營以見眞僞而快人心李續宜自必感勝保同仇

之意數月來披覽該大臣等章奏總覺意見未融該大臣向來辦事直遂徑行因爲展轉籌畫是卽所以保全該大臣之意將來論克盧郡之功則勝保揜拏首逆眾有明證若僅於軍營正法則眞僞難明謗議必多豈能排眾議而曲加殊恩想該大臣深知此意也將此由六百里加緊密諭知之○官文嚴樹森奏粵逆竄入武關秦中外險已失商州四通八達西可至藍田東北可繞潼關之後直至華陰正北則由小秦嶺而達渭南縣一渡渭河卽與同州府所屬處處毗連且豫省大股皖捻自竄擾宜陽縣後西趨永甯盧氏逾熊耳山卽入陝西雒南縣界可以直趨渭南縣是潼關雖險已成贅疣臣等以目下形勢論之不慮竄商南之粵逆合皖捻南趨轉慮犯雒南之皖捻會粵賊西竄況粵逆僞扶王僞遵王僞齊王等皆著名老賊兇悍異常非尋常皖捻志在擄掠者可比一

經深入不特腹地遭其蹂躪卽陝西省城亦必震動近又聞皖捻
劉大淵一股已由陳州周口陸續西向若爲此股後繼者陝省二
百餘年未見兵革茲驟遭粵捻之患民不知兵兵不習戰顛沛流
離固所不免而陝西爲財賦之邦西同鳳三府又爲菁華薈萃近
年用兵各省皆藉陝省協餉聊以支持卽京餉鉅款亦多取盈於
此大局所關誠非淺鮮刻下鄭元善駐師許州派軍繞扼西北跟
蹤追擊若不能繞出賊前卽成尾追之勢追之愈急入之愈深賊
蹤所過村市爲墟臣等晝夜焦思計惟先行驅賊出關然後會合
夾擊以保完善惟楚邊不靖三面傳烽兵以分而見單賊以聚而
益眾豫省光息正陽信羅桐泌等處徧地捻氛橫互千數百里處
處與楚接壤見在道員梁作楫率五營駐麻城之兩路口副將周
鳳山率四營駐孝感之三里城道員歐陽正墉率八營分駐德隨

安襄鄖荆道金國琛率六營駐襄陽分守要隘策應各路一經撤
動賊必伺隙交乘見在襄棗防務稍鬆臣等已飭總兵何紹彩四
營馳赴鄖陽先行相度地勢扼守要隘一面探明賊蹤所向拔營
前進會合陝豫官兵相機夾擊惟期合力截剿驅賊出關勿令流
毒完善以仰副 聖主睠念西陲至意李續燾所募勇丁臣等已
飛札催調一俟來鄂卽當竭湊行糧催令迅速赴豫歸鄖元善調
遣藉資得力 上諭見在陝省自孝義鎮安失陷後匪蹤距省止
數十里旬日以來未據瑛榮等馳奏軍情懸盼之餘益深焦急何
紹彩計已行抵鄖陽著卽嚴催該總兵督率所部星速赴援出境
夾擊毋得以扼守要隘爲詞任意延宕並著官文等酌派金國琛
抽調防兵分馳赴陝以期驅賊出關保全完善該大臣等旣知近
年用兵各省皆藉陝省協餉卽京餉亦取盈於此大局甚有關繫

急宜不分畛域設法救援該大臣素來公忠體國諒不至以邊境未清調派一軍遂謂塞責了事也鄭元善所派援兵著卽催令迅速進行毋稍遲誤李續燾所募勇丁計已成軍並著官文等催赴豫省交鄭元善調遣以資防剿另片奏參將李世玉驍勇善戰而歷練未久尙難獨當一面查有遊擊李殿元本屬襄人見充余際昌營官老練明白請飭鄭元善量材器使等語李世玉一員前經嚴樹森派赴湖南募勇著卽檄調旋鄂速飭赴豫毋許耽延李殿元見在豫省著鄭元善量加委任俾盡所長以資得力將此由六百里各諭令知之○諭寄諭署陝甘總督沈兆霖甘省營伍廢弛已久止有番兵尙可調用見在撒匪膽敢圍城著卽督飭官軍先解城圍並飭楊炳鏗將藥草臺一路設法進攻毋爲所乘此番調兵進剿原非與撒回爲仇惟匪勢猖獗不得不懼以兵威該署督

務當聯絡番團行以智計儻該匪畏懼兵威即可酌量受撫惟在該署督斟酌情形相機行事朝廷不爲遙制也將此由五百里諭令知之○允戶部奏查墾奉天大凌河荒地○禮部尙書朱嶠卒予祭葬諡文端○庚辰諭內閣已革兩江總督何桂清前因江蘇丹陽等城失守節節退避革職拏問茲據薛煥等派員解送到部著派大學士會同刑部嚴行審訊定擬罪名具奏○官文曾國藩多隆阿奏三月二十八九四月初三等日臣多隆阿飭總兵雷正綰等進逼廬州南門均近河沿築營扼其要害並飭各營增修礮臺以大礮向城轟擊晝夜更番出隊惟疊次進攻時該逆每以大隊出救臣多隆阿密飭各營先將雲梯暗運城下派總兵石清吉等營列隊西門水西門一帶派余福象等營列隊得勝門南門小東門一帶飭雷正綰率精選等營攻大東門外賊壘三座以誘賊

該逆以槍礮抗拒雷正綰等督令士卒拔毀木城四道填濠架梯而上維時陳玉城果率大隊悍賊由東門薄壘而來希圖援救經雷正綰等分隊迎勦奮力擊退該逆未敢入城卽循城向板橋河而去士卒進攻愈力斃賊甚夥多隆阿卽飭各營暨立雲梯由西門南門得勝門等處一擁而上城逆驚亂卽向北門出竄雷正綰等率兵追截適提督張得勝亦督兵練趕到北門兩軍併力截殺四眼狗見我軍追殺甚急當將板橋河浮橋撤去遂向壽州一路奔竄是役共殺斃賊匪九千有奇生擒老賊八百四十七名內有僞官二百十餘名均經訊明正法解散脅從男婦七千餘人於十五日克復廬州府縣城池此次將士用命力破堅壘克復名城斬馘幾及萬餘實足以伸天討而快人心上諭內閣昨據袁甲三奏多隆阿所部楚軍會合皖營攻克廬郡業經明降諭旨准將

在事出力員弁查明保奏茲據官文曾國藩等奏官軍克復廬州府城詳細情形陳玉城久踞廬州負隅死守經楚軍會合皖營將弁奮力攻剿克復堅城斬馘甚眾實足以伸天討而快人心多隆阿身臨前敵調度有方深堪嘉尙前於克復安慶案內業經賞給雲騎尉世職此次著再加恩賞加騎都尉世職○勝保奏臣克復潁上後飭令苗沛霖迅卽帶隊由江口集一路進剿擒匪務獲張逆臣卽日由潁州回太和督攻邢圩肅清後路正在分投部署聞疊獲僞函均稱狗逆陳玉城意欲竄踞壽州勾結皖豫各賊以圖北犯臣卽密飭苗沛霖扼要截剿毋令占踞壽城更不得任其假道致滋他患並諭以前次攻剿潁上張落刑逃竄已爲憾事今若能擒獲首逆非但建立奇功更可自明心迹果於四月十七日辰刻狗逆率其死黨二四千人竄至壽州城外東津渡地方苗沛霖

密派伊娃苗憬開前往下蔡一帶相機料理密令投誠粵匪余安
定開門迎接使之不疑苗憬開等候其進城即將釣橋撤去餘眾
阻隔城外當卽會同署壽春鎮遊擊朱佩葵調齊兵練突起拘執
立卽綑縛並將僞導王陳士榮僞從王陳得德僞王宗統天義陳
聚城僞主將向仕才僞王宗虔天義陳汝城禱天義梁灝新及其
親隨僞官二十餘人同時就擒臣接稟後馳回郡城派副都統常
海總兵博崇武等帶領馬步三千名馳赴江口集迎提逆犯詎擒
匪張落刑姜台凌粵逆馬融和等聞狗逆擒解臣營竟敢連夜裝
旗糾合大股捻逆數萬於二十二日突至江口集北岸附近賊圩
屯紮意欲半途劫奪逆首我兵卽會合苗練水路迎擊自辰至未
始將賊匪擊敗乘勢追殺十餘里殺賊二三千名餘眾遁歸賊圩
常海博崇武等當卽整隊押解該逆等於二十三日抵潁州軍營

親加嚴訊確係首逆無疑該匪罪大惡極臣於計供後遴派文武大員酌帶兵勇並先期飭令沿途州縣按站豫備夫馬將該逆陳玉城等檻送京師處以極刑以彰國憲而快人心已革四川北道苗沛霖前因攻克潁上奏請免罪此次復生擒首逆厥功甚偉可否賞還花翎布政使銜巴圖魯名號並開復道員原官抑或另予恩施之處出自 聖主天恩 上諭勝保奏生擒首逆陳玉城一摺狗逆陳玉城爲賊中首惡連年殘破郡邑荼毒生靈實屬罪大惡極著卽將該逆陳玉城在軍前凌遲處死並傳首皖楚各營以申國法而快人心僞導王陳仕榮等著一併在軍前正法此次攻克廬郡堅城痛殲巨逆多隆阿所部楚軍實屬異常出力著官文曾國藩迅速查明在事出力員弁兵勇保奏用昭激勸至設計誘取擒獲首逆並賊黨多名之員弁兵練亦屬著有微勞除前

沛霖另行降旨准予免罪外已革副將苗憬開著開復原官勇號並著交軍機處記名遇有總兵缺出請旨簡放署遊擊朱佩棻著以遊擊儘先卽補署總兵博崇武著賞加提督銜遊擊王金奎著賞給克勇巴圖魯名號以示獎勵其餘誘擒狗逆及隨同攻克廬州在事尤爲出力文武員弁著勝保袁甲三分別查明保奏○諭勝保奏楚師克復廬州陳玉城窮竄壽州經苗沛霖設伏誘擒請賞還苗沛霖花翎勇號並開復原官原銜等語苗沛霖因團練私憤輒敢擁眾圍攻壽州負罪甚重此次狗逆被多隆阿等軍追剿窮蹙竄入壽城若以縛獻微勞遽予開復恐不足以服天下之心苗沛霖著加恩先行免罪准其自新仍俟擒斬張落刑隨同官軍剿除蒙亳一帶擒逆巢穴後自必立予恩施以示朝廷賞罰一秉大公至意○諭議政王軍機大臣等譚廷襄奏南擒出巢分路竄

擾見籌堵剿一摺南捻分路竄撲意圖北犯亟宜大加懲創以固北路藩籬著遮克敦布親督兵勇探明賊蹤迎頭截剿勿令遁入水套其濮范防務卽交王榕吉督辦譚廷襄並知照德楞額等於嶧滕等處實力堵剿勿任紛竄如兵力不敷分撥卽著添募勁勇以資得力將此由六百里各諭令知之○諭勝保奏密飭苗沛霖設伏壽州生擒首逆檻送京師並苗練進攻江口集接仗情形各摺片苗沛霖設計擒渠功原足錄而其從前屢經反覆罪狀天下咸共聞知苗沛霖前此總以不得表明心迹爲憾可見其所重在名節不在官階此次僅釋其罪不遽復其官乃所以平眾人之心亦正爲保全苗沛霖計也前經疊諭該大臣飭令苗沛霖務將張落刑巨惡殲擒但粵匪見擾秦中張逆被剿窮蹙或由豫省西竄入秦更虞勾結爲患勝保尤應兼顧總宜令該練就地將雉河集

巨股殲除並將張落刑余安定信茂林一併擒獻必當立予恩施復其官職以示朝廷賞罰之公至此次苗沛霖之效力皆由懾服該大臣所致卽著傳知該練奮勉圖功以期疊膺懋賞朝廷用人行政自有次第權衡諒該大臣亦必能仰體此意牢籠驅策使之盡力也又據譚廷襄奏南擒復行北竄查有道員陳顯彝曾任館陶於地方情形熟悉且曉戎機見在勝保軍營請飭令赴東省館陶一帶辦理防務等語著勝保卽飭該員迅赴東省毋稍延誤將此由六百里加緊諭令知之○諭瑛榮妥辦陝西漢回團防○諭遮克敦布堵剿北竄擒匪○辛巳官文奏廬郡甫經克復陳逆四眼狗逃赴壽州狡計百出或聯擒匪以北犯或糾髮黨以東趨亟應覘其所向設計截剿又竄赴陝西一股如係該逆所使必將接踵西奔多隆阿率得勝之師分道躡追或可殲厥渠魁不至蔓延

爲害查多隆阿一軍素稱勁旅自去秋至今連克桐舒廬郡其勇
略實出諸軍之上紀律嚴明兵民愛戴聲威所至羣賊膽寒且多
隆阿秉性剛直決策神奇若使之受制於人遇事或有掣肘轉無
以盡其設施臣之愚見應令自成一軍以專責成而收實效此次
追賊壽州與勝保等軍相距較近多隆阿所部多係楚人恐與勝
保等營兵勇心志不齊難期合力用命而廬郡控制江北屏蔽全
淮竭數萬人血戰之功始能得此堅城仍應重兵駐守以固江淮
全局此後多隆阿一軍應如何調撥征剿容臣與曾國藩等細察
賊勢妥爲籌商再行奏請訓示遵行 上諭議政王軍機大臣等
托明阿瑛榮等奏賊偪省垣疊經兵團截擊回竄藍田見在追剿
並陝南軍務請畱大員督辦各一摺此股逆匪自孝義鎮安竄偪
陝省雖經兩次截擊竄走距省尙不甚遠卽商雒續來股匪亦未

大加懲創均難保不伺隙回竄孔廣順由藍田督兵追剿著卽趕
緊將渭南大股竄匪力圖殄殲托明阿瑛榮防守省城不得稍形
懈弛並飭各地方文武齊集兵團悉力守禦毋令賊得乘隙回撲
省垣渭南逼近渭河賊如偷濟咸陽古渡擾及蒲同一帶膏腴亦
不可不豫爲防範張芾有統帶鄉團之責瑛榮等奏各路民團助
戰甚爲得力深堪嘉獎著卽乘機激勵並會同地方官紳扼要堵
剿協助官軍務使賊匪所到不得肆擾保全完善舒保多隆阿皆
係楚之驍將陝省軍情如此喫緊非有勁兵名將難冀保全著官
文會商曾國藩於多隆阿舒保二員中酌量何員入陝爲最宜卽
一面奏聞一面派令率其所部星速入陝多隆阿如能前往其所
畱皖省之兵勇卽著交李續宜統帶鄭元善前奏河洛肅清匪股
無虞再竄陝境著卽督飭楊飛熊等軍實力堵截此後如有匪股

再由豫省續犯關中惟鄭元善是問晉省絳州直隸州牧李廷樟
檄次縣令俞世銓又寄寓山西之曾任知縣張保衡均著英桂畱
意酌量任使該撫何日出省何處駐紮並著速行具奏至川匪見
由洋縣西鄉城固回竄南鄭瑛榮等因該處距省較遠請將見寓
漢中之曹澍鍾暫畱督辦殊屬所保非人曹澍鍾前經胡林翼奏
參性行卑鄙遇事巧詐豈足獨當一面瑛榮張芾所請著不准行
陝西係沈兆霖兼轄著速飭馬德昭挑選精兵二三千名赴陝行
抵漢中卽飭相機督剿哈連陞已放漢中鎮馬德昭未到以前漢
中防剿事宜卽責成該鎮督辦並著駱秉章催令毛震壽帶兵繞
出賊前與本省官兵會合剿辦瑛榮張芾仍督率地方官紳將紛
竄各屬之零星股匪隨時剿擊毋或遷延坐待援師再據官文奏
多隆阿謀勇兼優足當專面見在克廬之後如可派往陝西更爲

得力仍著官文咨商曾國藩酌辦將此由六百里諭知官文嚴樹
森駱秉章托明阿瑛榮孔廣順張芾英桂鄭元善等知之○諭張
亮基奏覆陳滇省情形一摺據稱徐之銘舉止乖方倉皇失措既
受制於回眾更不能不要結漢人林自清無識無知未必非受其
指使雲南省城見在無一實職官員紊亂紀綱毫無法度擬整伍
而進酌量經權等語徐之銘種種乖謬疊經諭令張亮基及潘鐸
迅赴該省認真查辦該撫係張亮基所保不意壞法亂紀大負委
任至於此極該前督本難辭咎此時務當迅速赴滇力圖補救以
副朝廷簡畀之至意滇省地方糜爛張亮基帶兵前往餉需無出
若非鄰封豫籌接濟勢必停兵待餉節節耽延著駱秉章迅速撥
給銀六七萬兩解交張亮基行營俾得成行俟雲南稍有起色仍
著張亮基由捐項撥還歸款昨據何書倭仁奏前任御史竇垓志

行端謹守正不阿等語該員是否見在四川其人堪備簡任與否
並著駱秉章張亮基查明具奏將此由六百里各諭令知之尋奏
寶坻在重慶府東川書院主講品行學問士論所推堪膺簡任報
聞○是月蠲減貴州都勻等五府獨山等三十六州廳縣被擾積
欠額賦蠲免直隸安州等四州縣被水上年額賦